

**NINTH MIZORAM LEGISLATIVE ASSEMBLY
(SECOND SESSION CUM BUDGET SESSION)**

LIST OF BUSINESS

FOR SEVENTH SITTING ON WEDNESDAY, THE 28th FEBRUARY, 2024
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPER

2. **PU LALDUHOMA**, Hon'ble Chief Minister to lay on the Table of the House a copy of The Fourth Annual Report 2022-2023 of the Mizoram Lokayukta.

PRESENTATION OF REPORT

3. **THE DEPUTY SPEAKER** to present to the House The First Report of House Committee.

OFFICIAL RESOLUTION

4. **PU K. SAPDANGA**, Minister to move an Official Resolution in the following form :
 "Central Sorkar-in Free Movement Regime (FMR) tihtawp a tum leh Myanmar nena kan inrina, Border Fencing kalpui a tum hi tha kan ti lo va. Ti lo turin kan ngen a ni. Dik lo taka British Sorkar in Divide and Rule Policy hmanga Zofate min thendarh hi rorelna pakhat hnuaia kan kun leh theihna turin hma min lakpui zawk rawh se."

FINANCIAL BUSINESS

**DISCUSSION AND VOTING ON SUPPLEMENTARY DEMAND FOR
GRANTS FOR THE YEAR 2023-2024**

5. Discussion and Voting on Supplementary Demand for Grants for the year 2023-2024.

LEGISLATIVE BUSINESS

Bills for introduction, consideration and passing

6. **PU LALDUHOMA**, Hon'ble Chief Minister to beg leave of the House to introduce "The Mizoram Appropriation (Supplementary Demand for Grants 2023-24) Bill, 2024"

ALSO

to introduce the Bill

to move that the Bill be taken into consideration

AND

to move that the Bill be passed.

7. **PU LALDUHOMA**, Hon'ble Chief Minister to beg leave of the House to introduce "The Mizoram Lokayukta (Amendment) Bill, 2024."

ALSO

to introduce the Bill

to move that the Bill be taken into consideration

AND

to move that the Bill be passed.

VANLALTHANTLINGI
Commissioner & Secretary

HON. SPEAKER : *I rorelna fel takte chu zawm turin chhia ka chham a, ka ti nghet bawk a.*

-Sam 119 :106

Aw le, vawiin ah Member zahawm takte - Pu Lalmuanpuia Punte, a zin avangin vawiinah kan zingah a awm thei dawn lova. Chutiang bawkin Pu Lalthansanga, Member zahawm tak hi damlohna avangin; House ka han hriattir e.

Vawiin chu business a tam riau mai a, membrete'n hun hman kan thiam deuh dawn nia.

QUESTIONS & ANSWERS:

Tunah chuan, *Zawhna & Chhanna* ah kan kal nghal ang a; *Starred Question No. 81* - zawt turin Member zahawm tak East Tuipui Bialtu Pu Ramthanmawia ilo sawm ang.

Starred Question No. 81 - *Power siam chhuah chungchang.*

PU RAMTHANMAWIA : Pu Speaker, ka lawm e. Hon. Minister zahawm tak Power & Electricity Deptt. changtu chhan a tan ka zawhna –

“Tun Sawrkar-in power siam chhuah kawnga hma lak chhoh a tum dan min hrilh thei em?” tih a ni.

HON. SPEAKER : Chhang turin P&E Deptt. changtu Minister, Pu F. Rodingliana ilo sawm ang.

PU F. RODINGLIANA, HON. MINISTER : Pu Speaker, ka lawm e.

Mizoram sawrkar-in hydro-electric power policy tha tak a lo duan tawh zul-zuiin, hydro-electric project thawh tum te, power an thawhchhuah tur beisei zat te fel taka ruahmanna nen chak taka hma lak mek a ni. Hydel project bikah tunah hian small hydro-electric project, power pechhuak thei 15 kan nei mek a, a vaia an thar chhuahtheih chu 38.55 mW a ni. Amaherawh chu, power a siamchhuah theih zat hi khaw awmdan a zir zelin danglam reng thin a ni. Tin, heng small hydel project zinga thenkhatte chu a thumthat hna thawh mek a ni. Power tharchhuah kawngah hydel project siam belh tuma hmalak mek a ni a, chung te chu –

1. Tlawng HEP (120 mW) Near Lungleng – Hei hi Survey & Investigation (S&I) tih mek a ni a, Detail Project Report hi 2024 chhungin zawh hman beisei a ni.
2. Tuivai HEP (150 mW) near Ngopa.
3. Tuirini SEP (24 mW) Near Sesawng, hengte hi S&I tih fel tawh a ni a, DPR pawh peih fel tawh sa a ni. A thawhna tur sum ngaihtuah mek a ni.

Solar power siamchhuah lamah pawh sawrkar chuan theih tawp a chhuah mek a. Tunah hian *Grid connected SPV Power Plant (Solar) 10 mW near Thenzawl Village* hi hna thawh tan mek a ni. Tunah hian sawrkarin power siamchhuah kawnga hma lak chhoh a tum dante chu: -

1. Thenzawl Solar Plant (20 mWP) - PPA sign tura hma lak tum mek a ni.
2. Sumsuih Solar Plant (5 mWP) - State plan atgangin thawh tum a ni a, administrative approval pek chhuah tawh a ni.
3. Keifang Solar Plant (10 mWP) - PPA Mizoram Energy Development Agency (MEDA) te nen sign tawh a ni a, hmalak mek a ni.

Pu Speaker, ka lawm e.

HON. SPEAKER : *Zawhbelhna* zawt turin a zawhna neitu East Tuipui Bialtu zahawm tak Pu Ramthanmawia ilo sawm ang.

PU RAMTHANMAWIA : Kha, kan Minister zahawm takin hmalak a tum dan turte kan han hria a. Tin, a then kha chu sawrkar hmasa hmalakna lo kal chho zel chhunzawmna tur ni tein ka hria a, lawmawm hle a ni. Ka *Zawhbelhna* chu Pu Speaker, hei hi a ni –

- i) “Mizoram-in power-a intodelh turin mega-watt engzat nge tunah hian kan mamawh?” tih leh;
- ii) “State danga atanga lakluh nan hian sum thlakhatah engzat nge a sen thin?” tih te a ni e. Ka lawm e.

HON. SPEAKER : *Zawhbelhna* zawt turin Champhai North Bialtu zahawm tak Pu H. Ginzalala ilo sawm ang.

PU H. GINZALALA : Pu Speaker, ka lawm e.

Champhai khawpui hian power lamah harsatna kan nei ve thin a, a bik takin furah te. Chuvangin, Khawzawl 132 kV sub-station atangin 132 kV (alternate line) hi sawrkarin min ngaihtuah sak thei em?

A dawt lehah chuan, Kawlbem hydel project-a power evacuation line hi Hnahlan tlangdung chawm turin 33 kV line in sawrkarin min ngaihtuah sak thei ang em?

Pu Speaker, ka lawm e.

HON. SPEAKER : *Zawhbelhna* dang zawt turin, Palak Bialtu zahawm tak Pu K. Hrahmo ilo sawm ang.

PU K. HRAHMO : Pu Speaker, ka lawm e. Ka *Supplementary Question* chu hei hi a ni e – “Tuipang Lui mini-hydel project hi hman theih loha a awmna a rei tawh a; kan sawrkar thar hian hman tlakin repair tumna a nei em?” tih a ni e.

HON. SPEAKER : A theih ang anga chhang turin kan Minister P&E Deptt. changtu Pu F. Rodingliana ilo sawm ang.

PU F. RODINGLIANA, MINISTER : Pu Speaker, ka lawm e.

Tuipui Bialtu Pu Ramthanmawia rawn zawhna – “Mizoram-in power a intodelh turin hmalakna a nei em?” tih kha, hmalakna a awm nual a, solar leh hydro te kan target bik a. Tin, *rooftop-solar* a kan budget-ah hian mega-watt eng emaw zat khawpui chhung bik atan kan nei a. Tin, hydel project ah hian theih tawp kan chhuah a lui target bik kan nei a, nichina ka rawn sawi tak ang khan heng pathumah te hian target kan nei leh zual a. Tlawng Lui hi tun kuma peih tura beisei a ni a, amaherawh chu Mizoram hi lirnghing zone 5-naa kan awm avang hian project hmasa kha tlema tihdanglam a ngai a, kan tum angin hma kan la chak theih lova. Amaherawh chu, hei tuikhuah mai nilovin Mizoram-a tuihna lo tlem telh telh tih ziaawmna tur Aizawl khawpui chawmna atan te pawh tih kan tum a. Khawpui chhungin tui a mamawh mai bakah sangha khawi nan leh tourism attract-na tur te pawh kan han ruahman a. Tin, Tuivai hi 210 mega-watt a ni a, sawrkar hmasa lo ruahmannaah chuan. Mahse, uluk zawkin kan han zir a, forest leh thil dang dangah 115-a tihhniam kan tum a. Hei hi tunah hian project report te pawh revise leh mek a ni.

Tin, Tuirini hi, Pu Speaker, tlem ka han sawi zau duh deuh a. Kan ram lui hi Tuirial anga kum 100 mi ram tana han pek kha kan ui deuh hlek a. Chuvang chuan, kan agreement han sign pui tur leh midang kan han biakah te pawh, State thenkhatin an lo tih angin ‘35 years hi ni se; kan agreement sign ni atanga chhiar tan ni se’ kan ti a. chung avang chuan, investor thenkhat kan han biakte pawh tlemin an lo zirchiang ve leh a. Tuna Tuirial ang khu chuan heng kan han sawi te pawh hi khuap turin investor te pawh kan hmu nual a. Amaherawhchu, Pu Speaker, policy kan lo neih tawh khan kan lo zirchiang a. Chuvangin, kan ram luite hi keimahni, a ram neitu, (son of the soil) te kan ta a nih ran theihna tur kawng kan duh avangin investor kan hmuh thenkhat te hnenah pawh hian Tuirial te hi chu kan phal loh thu kan hrilh thin avangin 12% chauh nei a kum za chuang an neih hi kan phal lova. Chuvangin, investor te pawh an in-ennawn leh a, an offer hi sawrkar angin kan la pawm thei lova. Sawrkar angin kan offer ang te kan han pechhuak zawk a. Tunah pawh hian company 4-5 te pawhin inbe leh turin min rawn bia a. Kan duh dan kan thlen a, an duh dan an rawn thlen leh ang a, chuta tang chuan kan la insiam rem turah kan ngai a ni.

Kan sawi tak ang khan kan ramah hian solar siam duh an tam khawp mai a, chu chu tunah hian ngaihtuahna thar kan nei a. Kan solar hi chhunah chauh a hman theih a,

zanlam *peak-hour* laia kan hmana, kan electric chawkluh kan tihtlem theihna tura tan hmalakna kan nei a, chu chu battery system a ni a. Heng *battery system* te pawh a guarantee hi thla 6 vel a ni a, tuna company kan biak ho hi chu a lifetime kum hi 15 leh a guarantee kha kum 5 te a ni a. Chungte chu policy kan han duan thar leh technology-a hma kan lakna te a ni. Tin, a sawrkar ang pawh hian theih tawpa keimahni budget hmanga hmalak kan tum a ni.

Tin, Champhai Bialtu zahawm tak.... (*interruption*)

PU RAMTHANMAWIA : Pu Speaker, ka zawhbelhna kha pahnih a ni a, min chhang miah lova. “Mizoramin power intodelh turin megawatt engzat nge kan mamawh?” tih leh, “State dang atanga power lakluh nan hian thla khatah sum engzat nge kan sen thin?” tih te kha, min chhan theih chuan.

PU F. RODINGLIANA, HON. MINISTER: Power-a kan sen thin tlangpui chu, thla khatah ₹37,00,00,000 - ₹33,00,00,000 ang vel a ni a. Tin, power kan la mamawh zat hi tunah hian 156 mega-watts vel a ni a. Hei hi ‘peak hour’ kan tih a ni a. Kha kha kan han chhan theih dan ni ta se. Tunah hian hma a sawn zel a, hengte pawh hi la thang zel turah kan ngai a. Tuma kan mamawh chu kha kha niin ka hria.

Champhai Bialtu Pu Laltea zawhna, Kawlbem chungchang kha - Kawlbem hi 4 mega-watts chauh a ni a, a-chheh vel chawm tura ruahman a ni a. Tuna arawn sawi ang kha chu, kan han en leh ang a, a theih chuan hmalak dan kawng a awm leh awm loh te kan lo inzawt chiang dawn nia.

Tin, 133 kV hi duh duhna laia han pawh mai theih a ni lova, a chhan chu *-norms* a awm a, norms zawm chung hmalak tur a ni a. Khami norms kha kan zawm loh chuan, keimahni State-in thuneihna kan nei lova. Chuvang chuan, hmun hrang hranga tuna power indaihlohna te pawh hi RDSS scheme hmanga hmalak tum a ni. Chu chu tunah hian *Survey and Investigation* tih mek a ni.

Pu Hrahmo zawhna Tuipang hydel project chungchang kha - tunah hian *trial-run* tih leh a ni a. ‘Kum rei tak hlamchhiah’ a tih kha, a dik a, tunah hian tui awm velah *trial-run* tih leh tura hmalak mek a ni. Pu Speaker, ka lawm e.

HON. SPEAKER : Kan House Leader khan comment duh a nei em aw? Ilo sawm teh ang, khawngaihin.

PU LALDUHOMA, HON. CHIEF MINISTER: Pu Speaker, ka lawm e.

Kan luite hi khuah vek kan tum lova, kan ram environment a tihchhiat hi kan phal lova; amaherawhchu, kan mamawh bawk si a, eng emaw zat hi chu a tih loh theih loh a. Tin,

tuna kan project thenkhat hi compensation avang leh forest clearance avanga chhunzawm theih loh kan nei a, chung zingah chuan Chhimtuipui - Kolodyne project pawh a tel a ni.

Tin, Tuirini-*Small hydel project* chungchang hi han sawifiah deuh hlek ka duh a. 24 mW chhuak thei tur a ni a. Hei hi *externally-aided* project atangin New Development Bank-ina min finance tur a ni. Soft-loan a ni a, a pung pawh hi 1.25% chauh a ni a, a tha hle mai a; kum 19 chhunga neih tur a ni. A DPR hi March, 2007-ah daih tawh khan buatsaih a ni a. A kal zel, a kal zel a; tichuan, 2022-ah khan ₹584,00,00,000 ngai tura chhut chhuah a ni a. A consultancy service pawh hi ‘a thlawmin min rawn pe thei a ni’ tih kha an rawn hrilh a. Tichuan, kan inthlan hma lawk, November thla chho vel khan kan sawrkar hmasa khan a lo drop ta a ni.

Hei hi kan ui em em a, churang chuan, tunah hian tihnun leh tumin hma kan la a, ‘kan revive leh thei ang em’ tih chu kan chiang chiah lova. Amaherawhchu, kan indawr leh tan mek tawh a; tih theih hram ni se kan duh a. Tin, a that em emna chu - a vaia power lo chhuak tur hi kan ta tur a ni. Chutiang chu a nih avangin, tih hmanhmawh kan duh hle a ni. Tin, India leh foreign atanga min rawn dawrtu ka nei neuh neuh a. kan Serlui te pawh khu min tihpun sak thei, ‘khuah belh ngai lova tipung thiam kan awm e’ te pawh an rawn ti a. Tin, kan project hluihlawn tawh te pawh ‘kan ti thar leh thiam a ni’ ti te pawh an awm a. Chung chu ngun takin kan exam mek a ni.

HON. SPEAKER : Tunah *Starred Question No. 82* - a zawt turin Hachhek Bialtu, Member zahawm tak Pu Robert Romawia Royte ilo sawm ang.

Starred Question No. 82 - Autonomous District Council internal affairs chungchang.

PU ROBERT ROMAWIA ROYTE: Pu Speaker, ka lawm e. District Council & Minority Affairs Department changtu zahawm tak chhana tan, ka zawhna chu -

“Tun hnaia Sawrkar thar din hnuah Autonomous District Council pathumte internal affairs (an chhungkaw rorelna) chungchangah Governor thupek ni lovin DCMA Department a inrawh em?” tih a ni e.

HON. SPEAKER : A chhang turin District Council & Minority Affairs Department changtu Minister Pu C. Lalsawivunga i lo sawm ang.

PU C. LALSAWIVUNGA, HON. MINISTER: Pu Speaker, ka lawm e. Hachhek Bialtu MLA, Pu Robert Romawia Royte zawhna chhanna chu hetiang hi a ni -

“Autonomous District Council pathumte internal affairs (an chhungkaw rorel) chungchangah Governor thupek ni lovin District Council & Minority Affairs Department a inrawlh hriat a ni lo” tih a ni e.

HON. SPEAKER : *Zawhbelhna* zawt turin a zawhna neitu Pu Robert Romawia ilo sawm ang.

PU ROBERT ROMAWIA ROYTE: Pu Speaker, ka lawm e.

Kan hriat theuh angin *Autonomous District Council* pathumte saw India Constitution 6th Schedule hnuaiia thuneihna hrang nei an ni a. keini hi 7th Schedule hnuaiiah State-sorkar chuan thu kan nei a. Chutiang chuan, anmahnia inrelbawla rorelna fel tak te pawh nei an ni a. Tin, anmahni chhungkaw chungchanga an inrelbawlina tur ‘CCB Rules’ kan tih mai thin *Constitution & Conduct of Business Rules* te pawh kha an nei a.

Tichuan, tun hnaiah hian beisei loh takin (kan hre vek nge, kan hre vek lo ka hre lova) kan House te pawh hian Pu Speaker, kan hriat a tulin ka hria a. Kan member zahawm tak Pu Rasik Mohan Chakma hi CEM ni chungang MLA ni bawkw laiah hian *office of profit* dan bawhchhia ang deuha puhin show-cause notice pek a ni a.

India Dan-pui kan en chuan, *office of profit* chungchang hi Article 191-ah disqualification dan phung a inziak a. Tin, a disqualify dan tur chu Article 192-ah chiang takin a inziak a. Pu Speaker, i remtihna – ‘office of profit chungchanga in disqualify tur chuan, Governor-in a ti thei a. Mahse Governor khan ECI approval a lak a ngai a ni’ tih hi hi chiang deuha ka hriatna chu, keima chungchangah pawh kan ZPM unauite’n *office of profit* bawhchhia angin Governor-ah complain an thlen a; Governor-in ECI ah an thlen a; ECI-in ruling fel tak *judgement* arawn siana thiam ka channa te chu kan hriat vek kha. Tin, kan Sawrkar chungah pawh hian dan angin Governor thuchhuak leh ECI thuchhuak gazette copy-a min chhuahsak te kha ‘ka lawm khawp mai’ tih te kan sawi tel duh a.

Chuvang chuan, Pu RM Chakma hnenah show-cause notice hi DCMA Department-in a pe tur a ni lo ang. ‘An lungawi lova, tihsual te a nei a nih chuan, a thlenna tur dik takah thlen tur a nih hmel e’ tih kha kan sawi duh a.

Chutiang tho chuan, tunhnaiah LADC CEM Pu V. Zirsanga chungchangah pawh show-cause notice nge ka hre chia lova, hemi court decision bawhzuiin DCMA atangin hriattirna nge, (show cause notice tho maw?) Pu Speaker pek a ni a. Hei hi DCMA hian show-cause notice, eng emaw lungawilohna a nei anih pawhin an chairman ah zawk thlen tur niin a lang a; LADC Chairman-ah. Chutah Chairman chuan arawn duh chuan, Governor-arawn tur a ni. Chuvang chuan, heng show cause notice han inpeka, ‘DCMA inrawlh lo’ tih hi, ‘Governor inrawlhna ngeia tih a ni em?’ tih kha kan zawt nawn leh teh ang. Zawhna chhannaah kha chuan - ‘*Governor-a inrawlh lo*’ tih a ni a; ‘*a hriatpui lova tih a awm ngai lo*’ tih a ni a. Heng case pahnihah hian, ‘Governor hian ama thua tih a ni em?’ tih kha kan zawt nawn leh duh a ni. (*Member tu emaw, ‘A zawt dawn nge,*

thu a sawi dawn? tiin a lo inrawlh a..) A thu zir hian han sawi ve deuh ngai te hi a awm ve a; hriatthiam hram hram a ngai a nia. In minister bill-ah pawh i sawi ve tho kha ..

HON. SPEAKER : Ngawi teh u; ‘Governor-in a hriatpui em?’ tih kha a ni maw, a zawhna ber chu? District Council chungchang a ni a, kan Assembly hian thui tak kan sawi theiloh te pawh a awm mai thei. Engpawh ni se, *Dan leh Dun* lampang kaihhnawih thil a ni a, hetah hi chuan thui tak kan sawi thei lo mai thei a. Zawhna chu a chiang e – “Governor-in a hriatpui em; DCMA-in show-cause notice a pe em?” tih a nih kha.

Zawhbelhna - Pu V. Malsawmtluanga, Lunglei North Bialtu zahawm tak i lo sawm ang.

PU V. MALSAWMTLUANGA: Pu Speaker, ka lawm e.

District Council & Minorities Affairs Department changtu kan Minister duhawm tak Pu C. Lalsawivunga chhan atan a ka zawhbelhna chu –

“Mara Tribal Hostel Delhi a sak tur *Article 275* hnuiaia sum sanction tawh nuai 700 chuang, a hmun pawh MADC-in anmahni suma an lo lei tawh kha eng tika sak tan tur nge?” tih laia kha ka zawhna a ni e. Ka lawm e.

HON. SPEAKER : *Zawhbelhna* - Lawngtlai West Bialtu, Member zahawmtak Pu C. Ngunlianbunga ilo sawm ang.

PU C. NGUNLIANCHUNGA: Pu Speaker, DC&MA Minister zahawm tak changtu hnenah zawhbelhna chu –

“DC&MA Department hian ADC te hnenah aikal chhawr leh chhawr loh chungchang DC&MA-ah report turin a hriattirin, *zawhna* a zawt em? Zawt ta se, eng dan tlawh chhanin nge a zawh min hrilh thei em?” tih a ni a.

Pahnihnaah chuan, Dt. 7.2.2024 Pu Speaker, i phalnain - Deputy Secretary lehkha *Memo No.A.60011/1/2019/DC&MA* hi chhang lo ta se, DC&MA hian engtin nge a tih dawn; kha aikal report tura DC&MA-in District Council hnuiaia staff-te aikal awm leh awm loh zawhna kha?” tih kha ka zawhbelhna a ni e.

Nichina kan ngaihthlak kha, Pu Speaker, tlemte Ka han sawibelh lawk ang a - Sawlai Autonomous-te saw *dan* hran neia ding an ni a, ‘*subject* an nei ve a ni’ tih hi kan hriatsak a pawimawh khawp mai a. Chuti ni lova, helai atanga *department pakhat* ang maia kan ngai a nih chuan a fel lovin ka ring a. “Autonomous Council-te hi India Dan-pui hnuiaia rorelna hran nei an ni ve a ni” tih kan hriatsak fo a thain ka hria; khalai kha ka zawhbelhna a ni e.

HON. SPEAKER : A lawmawm e. Theih ang anga chhang turin District Council & Minority Affairs Department changtu Minister, Pu C. Lalsawivunga ilo sawm ang.

PU C. LALSAWIVUNGA, HON. MINISTER: Pu Speaker, ka lawm e.

A zawhna neitu Pu Robert Romawia Royte zawhbelhna kha chu helai kan chhanna atang khan a fiah felfai viau mai a. ‘Governor thupek ni lovin’ tih khan engkim a chhang fiahin ka hria a. Chuvang chuan, Governor hriatpuina ang zelin kal a ngai a.

Tin, Pu Rasik-a chungchangah pawh hian eng emaw clarification ‘Governor-in a mamawh angin kaltir a ni’ tih kha ka chhanna ni ta se la. Tin, Lunglei North Bialtu zahawm tak Pu V. Malsawmtluanga zawhna kha, Mara Autonomous District Council tan *Girls Hostel* Delhi-a sak tur chung chang kha a ni a, kha kha anmahni hmalakna liau liau a ni a. Hma an la a, amaherawhchu, hnathawh theih a lo nih khan harsatna a awm a, a thawktu tur chungchangah. Tichuan, thawh theih lovin a awm reng a; Sawrkar thar a lo piang a. Sawrkar-thar chuan danglamna mipuite hmuh turin a rawn lan chhuah tir a, rang takin a buaipuitu Mara-te hnenah hnathawh tur hi thawk tura tih an ni a, tunah hian hmalakna a kal chho mek a ni.

Tin, Pu C. Ngunlianchunga zawhna – ‘ADC-te ah aikal chungchang thawm a ni em?’ tih kha - kan thawm a ni. Hei hi DP&AR atanga lehkhaha kan hmuh angin, ADC 3-te hnenah hian anmahni hnuaiyah aikal an awm leh awmlah report turin Ni 7 February, 2024 ah khan lehkhaha thawm chhuah a ni a. Tin, DC&MA chungchang bika hi chu, GAD-in min zawh angin, report pawh ‘*Nil*’ tih pek a ni bawka a ni.

Helai hi ka sawi zau deuh duha chu (min lo hrethiam sela) - Aikal chungchang hi kalphung thar sorkarin Ni 100 chhunga tih tur - *100-days priority* Mizoram Chief Minister zahawm takin a puan zinga mi kha a ni a, hemi bakah hian kan zavai hian Mizoram chhunga cheng leh khawsa kan ni vek a, chutiang chuan District Council & Minority Affairs Department pawh hi *administrative department* kan ni bawka a. Administrative department kan nih angin ADC pathumte dinhmun, aikal chungchangah sawrkarin a hriat duh te hre tura zawhna kan zawh hian, an thuneihna va chhuh tumna a awm kan hre lo a ni. Chu chu ni sela; hemi bakah hian Executive Secretary te “direction a pe thei em?” tih kha niin ka hria a, ka lo chhinchhiah dan ah khan; khalai pawh kha tawitein han chhang dawn ta ila. Deputy Secretary, DC&MA hminga lehkhaha hi thawm chhuah a ni a, thudik a ni. Eng emaw ‘Sawrkar kalphung hi hriatchian tawkw lohna a awm a ni mai lo maw’ tih kha ngaihtuahnaah a awm a ni. A chhan chu higher authority, higher official ten file-ah tih tur an tih kha, signatory an nih angin lehkhahaah khan an sign lo thei lova; an sign a, chu chu pekchhuah a ni thin a. Hetiang lehkhahaah hian a thu bul tannaah, ‘*I am directed to..*’ tiin a intan tlangpui thin a; ‘directed’ tih thumal a awm avang khan Executive Secretary te lehkhaha an va thawm hian a hniam zawk

(lower post) te khan direction an va pe tihna ni lovin, ‘*I am directed to...*’ tih hmanh khan thuneitu sang zawk, ‘kan chung a mite’n ti tura min tih angin...’ tih a kawka, chu chu kan hriatthiam pawh a tha awm e.

PU C. NGUNLIANCHUNGA: *Point of Clarification* - Kan Minister hi a demawm chuang lova. District Council inrelbawlina saw kan hriatthiamtui a pawimawh khawpin ka hria a. State DP&AR-in an staff recruit chungchangah te, an administration chungchangah te a inrawlh tur a ni lo. Anmahniin dan, Recruitment Rules (RR) leh CCB rules hran te pawh neia a hranpa veka kal an ni a. Amaherawhchu, sawrkar kalphungah chuan Dy. Secretary a ni emaw, Under Secretary a ni emaw, chu chuan eng emaw correspondent a awm chuan, a va thawn tur a ni. Mahse, khati loa a staff-te chungchang thu - aikal awm leh awm loh kha ‘State DP&AR Department hian a va concern lo a ni’ tih lai kha kan hriat a tha khawp mai. India ramah kan awm a, tate hrang hrang kan awm a, state hrang hrang thuneihna awm a ni. Sawlaia Autonomous Council-te saw Sixth Schedule.... Pu Speaker, sawlai saw ‘India Constitution humna hnuai a awm an ni’ tih lai kha kan hriat sak loh chuan, helai atanga kalpui ngawt kha ‘a kalphung a ni lo e’ tih lai kha zirchiang zawk se a tha khawpin ka hria.

Khalai kha Pu Speaker, min hriat sak se; hma lama a kal zelnaah pawh ‘khalai kha, in chuti khati hrim hrim...’ tih lam ni lovin, kan thuneihna chin hi kan hriat ve a tha a ni. Mahni pal pela thianta pal va sik tal emaw, va englo tal kha...

PU C. LALSAWIVUNGA, HON. MINISTER: Report pe turin kan dil mai a ni. An thuneihna kan va chuhna a ni lo. (**Pu C. Ngunlianchunga:** Enga tan nge an lo report ve ang, state-ah chuan? State service an ni lova, DP&AR hnuai a

PU TBC LALVENCHHUNGA: Pu Speaker, *Point of Clarification* - Zawhbelhnaah khan, “khawi atangin nge salary an lak; tu thuneihnaah mah an awm lo” tih lai kha, “*Consolidated fund of the State* atanga sum late thuhnuai a an awm a ni” tih lai erawh hi chu hria se a tha.

PU C. NGUNLIANCHUNGA: Kha kha chu District Council tan a hranpa liau liaua pek a ni. Tunah pawh a kal danah chuan, State Finance Commission II-na in rawtna a siam a, *local bodies*-te tana pawisa a pek atanga hlawh la anni. Khalai kha kan hriatthiam a tha ang e.

HON. SPEAKER : Minister kha chhan zawh tir ang aw, phawta...

PU C. LALSAWIVUNGA, HON. MINISTER: ADC pathumte pawh hi Mizoram State Sawrkar hnuai a awm anni a. Tichuan, kan Sawrkarin aikal chungchanga an dinhmun kha hriat a duh a ... (**Pu C. Ngunlianchunga:** Autonomous Council-te hi anmahni kut-kea ding an ni.)

Kan ram chhunga mi vek an ni; Sawrkarin a tih tur a ti a ni zawk. ADC-te hnuaiah eng ang nge an dinhmun kha hre turin *Administrative Department* a nihna angin zawhna a zawt mai a ni; an rorelnaah khan a va inrawlh lo. Chu zawk chu kan hriatthiam a tha. (Pu C. Ngunlianchunga: Enga tan nge hriat ve in duh, chu chu?)

Administrative Department kan ni a, ADC-te pawh huamin aikal dinhmun hi Mizoram pumpuiah Sawrkarin hriat a duh a. Chuvangin, ADC-te pawh an dinhmun hre tur chuan zawhna kan va zawt mai a ni. Chu chu ka chhanna a ni e.

HON. SPEAKER : Aw le, a lawmawm e. Kan House Leader-in engnge sawi duh a neihte sawi turin i lo sawm ang.

PU LALDUHOMA, HON. CHIEF MINISTER: Pu Speaker, ka sawi duh chu - nichinah khan Hachhek Bialtu, Member zahawm takin a rawn zawhna kha - tunah hian kan MLA zingah MDC ni-kawp te an awm a, chu chu Governor-in a ngaipawimawh a ni. Anmahni District Council chhungah *Member nih-kawp awihlohna* dan an nei ve a ni awm e; tin, kan Sawrkar hian a nei bawk a ni. Chung dan pahnihte chu an bawhchhia nia a lan avangin, file-ah 'hei hi zawh chian tur a ni' a rawn ti a, Governor thupeka kal a ni a.

Tichuan, an lo bawhchhia a nih chuan, a disqualify theitu chu Election Commission a ni lo; khu lama thlen a ngai lo; kan *Speaker* hi a ni zawk. Kan Speaker hian a duh chuan a disqualify ang a, a khawngaih deuh chuan a disqualify lo ang a; thuneihna neitu chu kan *Speaker* hi a ni. Kha kha han sawifiah a thain ka hria a.

Tin, kan District Council (**Pu Robert Romawia Royte:** Kan Speaker-in *Office of Profit* hnuaia dan bawhchhia a disqualify theihna dan kha kan House Leader hian min hrihlh law law sela a va tha awm ve?)

Pu Speaker, *Office of Profit* lam a ni lo; *Dual-Membership* lam a ni. Hei hi thuhran daih a ni; kha nen khan kaihhnawih chi a ni lo. A zawhna zawttu kha a Chiang Lova, 7th Schedule te kha a rawn sawi a. 7th Schedule te chu - Union List te, Concurrent List, State List te sawina daih a ni; thil hi hriat chian deuh a tha. District Council-te kha chu 'thu an awih lo' tih kha chu a awm lo a nia.

PU K. HRAHMO : Pu Speaker, *Point of Clarification* - District Council chuan CCB Rules kan nei ve a, 'MDC leh MLA te, MDC leh MP te a kawp thei a ni' tih Chiang takin a ziaak a ni.) Chu chu, Mizoram State hian kha *dan* ve tho kha kan lo pass a, chu chu 'a bawhchhia nge, bawhchhe lo' tih kha Governor-in a hre duh a. Chuvang chuan, insawifiahna chance a pe a ni. Tichuan, a tawpah thu chu a titlu ang a, amaherawhchu, MLA atanga ban theitu chu kan *Speaker* a ni; *dan* a bawhchhiat chuan.

HON. SPEAKER : Aw le. Ni e, he subject hian sawi a hlawh a, a lawmawm khawp mai. Thil hi a nih dan hriat zel te hi a tha a.

Kan House Leader rawn sawi ang khan, thil pakhat kan hriat tur chu - tunah khan kan sawi pawlh deuh hlek a; *Office of Profit* leh *Dual Membership* chungchang kha a ni a. *Office of Profit*-ah chuan - Governor-in a en ang a, thuthlukna pawh a la siam mai lo ang a, Election Commission of India ngaihda a zawt tur a ni. Tichuan, Governor-in a tul leh tha a tih chuan (a case a zirin) a case a en ang a, ‘hei hi *disqualify* awm a ni’ a tih chuan, *disqualify* theitu chu *Governor* a ni. Amaherawhchu, *Dual Membership* chungchangah chuan keini khan *Removal & Disqualification of Members Act, 1975* kan nei a ni. Khatah khan exemption list-ah – Chairman te, Vice Chairman te, Member of the Autonomous District Councils te kha a awm a. A awmzia chu – ‘MLA pawh a ni thei a; MDC pawh a ni thei a ni’ tih a ni. Mahse, 1986-ah khan amend a ni a, chutah chuan – ‘Chairman; Vice Chairman; Member’ tih kha thlakthlengin ‘Chief Executive Member; Executive Member’ tiin a thlakthleng a ni. 2006-ah khan amend leh a ni a, kha *Principle Act, 1975* a *Article 4* kha a omit ta a ni; ‘*Dual Membership* nih theihna kha a paih sak ta a ni’ tih a ni.

Amaherawhchu, chutih rual rual chuan member zahawm takte leh House pawh ka han rawn duh che u chu - heng hi thil awmsa a ni a, keiniin vawiina kan sawia danglam/danglam lo thei a ni lova, kalkawngah a kal mekah ngai ila. *Office of Profit* chungchanga ngaihtuah tu tur chu *Governor* a ni a, a ngaihtuah mai ang. Chutiingin, *Dual-Membership* chungchang a nih pawhin, a kawng a zawh mai ang a. Chuvangin, kan sawi kha bengvar nan hmang ila, duh tawk ila a thain ka ring a.

Tin, member-te ka ngen leh duh chu - a tira ka sawi ang khan, vawiin hi business kan ngah khawp mai a, business 7-8 lai mai kan nei a. Chuvang chuan, kan kal deuh zung zung a ngai dawn a, kan inhriatthiam tlan a ngai dawn a ni.

Tunah *Starred Question No. 83*-naah kan kal ang a. Zawt turin Serlui Bialtu zahawm tak Pu Lalrinsanga Ralte ilo sawm ang u.

Starred Question No. 83 - *2024-2025 chhunga Sawrkar-in kuthnathawktute tana a hmalakna chungchang.*

PU LALRINSANGA RALTE: Pu Speaker, ka lawm e. Agriculture Minister chhana tan, ka zawhna chu hengte hi an ni e -

- a) “Kum 2024-2025 financial year chhung hian kuthnathawktute tan sawrkarin ruahmanna engnge a neih?” tih leh;
- b) “Serlui bial chhungah kum 2024-2025 financial year chhung hian hmalak tumna a awm ve em?” tihte a ni e.

HON. SPEAKER : Chhang turin Agriculture Department changtu Minister, Pu P.C. Vanlalruata ilo sawm ang.

PU P.C. VANLALRUATA, HON. MINISTER: Pu Speaker, ka lawm e. Serlui Bialtu, Member Pu Lalrinsanga Ralte zawhna chhanna chu hei hi a ni e -

“Kum 2024 - 25 financial year chhung hian kut-hnathawktute tan sawrkarin ruahmanna chi hrang hrang - Rashtriya Krishi Vikash Yojana (RKVY) leh Krishonnatti Yojana (KY) hnuai a te a siam a. He ruahmanna hi district zawng zawnga kalpui tura siam niin, Serlui bial chhung tan hmalakna tur ruahmanna pawh telh a ni” tih a ni e. Ka lawm e.

HON. SPEAKER : *Zawhbelhna* zawt turin a zawhna neitu Pu Lalrinsanga Ralte ilo sawm ang.

PU LALRINSANGA RALTE: Pu Speaker, ka lawm e. Ka zawhbelhna chu hei hi a ni e -

“Zau hrang hrangte enkawl dan kimchang leh, Zau atanga thar chhuah leh hralh chhuah dan awmze neia siam tumna a awm em?” tih kha pakhatna ni se. Ka han sawi nawn leh ang a - “Zau hrang hrangte enkawl dan kimchang leh, Zau atanga thar chhuah/hralh chhuah dan awmze neia siam tumna a awm em?” tih kha ka pakhatna a ni a.

Hei hi Pu Speaker, kan sawrkarin SDRP hnuai a hian agriculture chungchangah hmalak tumna a awm a. Hei hi a tulin, a pawimawh riauin ka hria a; hemi hi kan ti thei dawn a nih chuan, kan kuthnathawktute tan pawh awlsamna nasa zawk a thlen theiin ka ring a. Kha kha a awm thei a nih chuan a lawmawm ngawt ang.

Tin, ka *Zawhbelhna* pahnihaah chuan - ka bial, Serlui Bial hi *potential area*, agriculture ah pawh nasa tak mai a ni a. Tin, leilet hmun leh Zau hrang hrang, phai-leilet hmun tamna a ni a, buh leh bal tam tak chinna hmun a ni a. Tin, heng kan leilet leh kan zaute hi a tlangpuiin leilet phai panna kawng (a hmun a lo hniam deuh avang pawh a ni ang a) hi a tha rei thei lova, a mumal lo khawp mai a. Sawrkar hmasa khan kan bial chhungah leilet-zau hrang hrang panna min khawihsak tawh a, heng khawih loh pawimawh tak tak mai FOCUS hnuai atang tih tum, la tih hman loh, Chite-phai - Vairengte ah te, Chempai - Bilkhawthlir ah te a awm a. Hengte hi a theih hram chuan “FOCUS hnuai atangin emaw, a rem theih dan dan angin kan Minister hian ruahmanna min siamsak thei ang em?” tih kha a ni e.

HON. SPEAKER : Zawhna zawt turin, Aizawl ‘S’ - III Bialtu zahawm tak, Pi Baryl Vannehsangi ilo sawm ang.

PI BARYL VANNEIHSANGI: Pu Speaker, ka lawm e. Agriculture Department Minister ka zawhna chu hei hi a ni –

Pu Speaker, i remtihain - January, 2024-a thuthar lakhawmtute'n a an puanchhuah tak ang khan, Aizawl kawtchhuahah hian wholesale-market pali siam tur a ni a, khang hmun palite kha thlan fel a ni tawh em? Tin, a thlan dan (a tehfung) kha khawngaihin min hrilh thei sela; Entirnan: 'Hmun-hma Sawrkarin a neih danah nge, thlai tharchhuah lamah' tih te kha, a *criteria* kha khawngaihin min hrilh thei se ka lawm hle ang. Pu Speaker, ka lawm e.

HON. SPEAKER : Chhang turin Agriculture Department changtu Pu P.C. Vanlalruata ilo sawm ang.

PU P.C. VANLALRUATA, HON. MINISTER: Pu Speaker, kan member Pu Lalrinsanga Ralte zawhna kha – “Zau hrang hrangte enkawl dan tur leh an tharchhuah hralh chhuah dan turah ruahmanna a awm em?” tih hi –

Sawrkar chuan ruahmanna a siam mek a. Sawrkar thar hian kal tum dan - *policy framework* neia sawrkarna siam te kan ni bawk a, Pu Speaker. Chuvang chuan, zau hi kan ngai pawimawh dawn a ni. Zau hi a tam thei ang ber develop kan tum dawn a. Chuvang chuan, zau enkawl dan tur te hi sawrkarin ruahmanna fel tak a nei chho mek zel a.

Tin, ‘tharchhuah hralh chhuah dan turah hian ruahmanna a awm em?’ tih hi, hei, Sawrkar thar hian ruahmanna an siam nghal deuh ut ut a, *Agriculture Market Assurance Fund Management Board* te a din rup rup a ni, tunah hian. Hun kal tawha hmunphiah chungchang kan han sawi viau te pawh kha a nihna takah chuan, sawrkar kan thar lutuk a, chuvang chuan, ruahmanna chawp leh chilh taka siam a ngaih avangin hemi a tharchhuah hralhna tur kawngah hian duh ang tawkin hma lak a har khawp mai a. Tunah hian kan Finance Minister leh kan CM zahawm takin a ngaihpawimawh em avangin SEDP-a sum lo hman loh ruahmanna an lo neih tawh, mahse sum a taka hman la tih theih si loh cheng vaibelchhe 150 awm atang khan vaibelchhe 110 kha kan CM zahawm tak (kan Finance Minister ni bawk) in a han siam nghal rup rup a ni a. Hei hian kut-hnathawktute a ngaih pawimawh zia a ti lang chiang khawp mai a. Chutihruah chuan, helamah a department lampang hi kan la inpeih hman lo a ni, dik tak chuan. Tunah pawh hmunphiah lei te pawh kan han duh viau a, ruahmanna pawh a awm a. Amaherawhchu, December ah sawrkar a piang chauh a, chutiang a nih avang chuan sawrkar inbuatsaihna, ‘channel’ ti mai ang, a instrument kha siam a ngai si a. Khaw tinah society din a, chumi kaltlang chuan kan thali-tharte hi a lei dan tur ruahmanna siam tum a ni. Amaherawhchu, chutiang em pawh kan din hmain hmunphiah season a lo ni mek a, a buaithlak khawp mai a. Sawrkar a kal chak viau rualin, kan duh angin thil kan ti rum rum hman lova. Sawrkar chuan chak taka hma la nghalin *Agriculture Market Assurance*

Fund Management Board a din nghal a, tunah hian operational guidelines buaipui mek a ni. Hun lo kal zel turah chuan ruahmanna fel fai tak nen heng kan thlai tharchhuahte hi a hralhna tur ruahman tur a ni ang.

Tin, Chite-phai, ‘Chemphai vela FOCUS hnuaihia hian ruahmananna min siamsak thei ang em?’ tih zawhna kha – Ruahmanna sawrkarin a siam ngei turah pawh kan beisei a, FOCUS te pawh a lo kal leh turah kan beisei a ni. Chutiangah chuan ruahmanna sawrkarin a nei zel ang a, heng kan *potential area* neih thatte hi chu sawrkarin a ngai pawimawh hle dawn a ni.

Tin, Aizawl South-III Bialtu, member Pi Baryl Vanneihsanghi zawhna – ‘Aizawl Kawtchuahah *wholesale market* pali siam tur’ tih kha, kan lo sawi tawh a. Sawrkarin *vegetable supply chain* hi a ngai pawimawh hle dawn a, kan policy te pawh a ni a, chumi bawhzuina tur chu a ni a. ‘A hmunhma thlan chungchangah hian ruahmanna in siam tawh em?’ tih laia kha chu, tunah hian ngaihtuah mek a ni a, a *criteria* a hranpaa siam vak theih pawh a ni lova. Sawrkarin hmun kan lo neih sa tawhte a awm a nih chuan, chungte pawh chu kan en phawt ang. Tin, kan la neih lohna hmunah te phei chuan kan han zir chiang ang a, chutiang chuan hmalakna felfai taka neih tum a ni e. Ka lawm e, Pu Speaker.

HON. SPEAKER : Tunah *Starred Question No. 84*-ah kan kal ang a, zawt turin Lawngtlai ‘W’ bialtu zahawm tak Pu C. Ngunlian chuanga ilo sawm ang.

Starred Question No. 84 - *Lawngtlai Vengpui YLA Field chungchang.*

PU C. NGUNLIANCHUNGA: Pu Speaker, ka lawm e. *Starred Question No. 84* - Sports & Youth Services Department Minister zahawm tak chhan atana ka zawhna chu

- a) Lawngtlai Vengpui YLA field thawh zawh tawh a ni em?
- b) Zawh ni lo se, engnge a chhan?
- c) Engtikah nge thawh zawh a nih theih ang?
- d) Tunge a contractor, a hming leh address kimchang nen?
- e) Amount engzat nge?
- f) Hnathawh hi tunge supervise?
- g) Hnathawh hi Supervisor ten tha an ti tawk em? An lungawi tawk em?
- h) Physical Achievemnt leh Financial Achievement min hrilh thei em? tihte a ni e.

Pu Speaker, ka lawm e.

HON. SPEAKER : Chhang turin Sports & Youth Services Department changthu Minister Pu Lalnghinglova Hmar ilo sawm ang.

PU LALNGHINGLOVA HMAR, HON. MINISTER: Ka lawm e, Pu Speaker. Lawngtlai West Bialtu, Pu C. Ngunlianchunga zawhna chhanna chu hetiang hi a ni –

- a) Lawngtlai Vengpui YLA field hi thawh zawh a la ni lo.
- b) Hna zawh hun tura ruahman hi Dt.11.7.2024 a ni a. Hemi hun chhung hian thawh zawh hman ngei beisei a ni.
- c) Hna zawh hun tura ruahman Dt.11.7.2004 hmain zawh fel tum a ni.
- d) Contractor chu M/S Décor India, GS Road, Guwahati a ni. Hei hian Sports & Youth Services hnuaiah hian hna thahnem tak a thawk a ni.
- e) Work order amount chu ₹914.77 lakhs a ni.
- f) Mizoram State Sports Council Engineer te'n an supervise thin.
- g) Mizoram State Sports Council hian Mizoram puma sports infrastructure-te a enkawl avangin, Vengpui YLA Field pawh hi Mizoram State Sports Council Engineer-te hian an awm chilh thei lova, a remchan dan angin tlawh thin a ni. Chuvang chuan, hnathawh tha tawk lote a lo awm a nih pawhin, siam that tir leh vat thin a ni.
- h) Physical Achievement chu 90% a ni a, Financial Achievement chu ₹871.73 lakhs a ni.

Ka lawm e.

HON. SPEAKER : *Zawhbelhna* zawt turin South Tuipui Bialtu zahawm tak, Pu Jeje Lalpekhlua ilo sawm ang.

PU JEJE LALPEKHLUA: Pu Speaker, ka lawm e.

Kan rama Sports lama hmasawn tur chuan infrastructure tha tak neih hi a lawmawm rualin, a hnuaia thawk tur sports-persons te tana thleng phak *association* tha kan neih tel hi a thain ka hria a. Tin, association kan neih that chuan, competition siam tam te, inelna hrim hrim neih tam hi a keng tel nghal a. Tin, inelna kan hmachhawn tam hian experience kan neih tam phah hle thin a. Tin, State chhunga inelna competition a tam hian, state pawna kan kal pawha inrintawkna (confidence) kan neih phah thin a ni.

Entirna han pek lawk ka duh a. School building tha tak neiha, a thawktu zirtirtu leh a hnuaia thawktu neih that leh si loh ang hi a niin ka hria a. School building tha si, a zirtirtute leh a thawktute neih that leh si loh chuan, naupang an hnuaia zirte tan khan hmasawna a tuantling lo a awm thin niin ka hria a.

Helaia Sports & Services changtu Minister ka zawhna chu - Mizoram Sawrkar hian Sports Association tichak turin ruahmanna a nei em? tih leh, “inelna tam zawk buaisaih a tum thei dawn em?” tih a ni e. Ka lawm e.

HON. SPEAKER : *Zawhbelhna* zawt turin Pu K. Hrahmo, Palak Bialtu zahawm tak ilo sawm ang.

PU K. HRAHMO : Pu Speaker, ka lawm e. Kan Minister zahawm tak hi ka mi rin zawng tak a ni a. Hei, thla hnih-thum vel minister a ni a, hemi chhung hian artificial turf phah tumna a nei em? Nei ta se, eng khuaah te nge phah a tum? tih a ni e.

HON. SPEAKER : A lawmawm e. *Zawhbelhna* zawt turin Pu VL Zaithanzama, Aizawl West-III Bialtu ilo sawm ang.

PU VL. ZAITHANZAMA: Pu Speaker, ka lawm e.

Sports & Youth Services Department changtu Minister chhan atan ka *zawhbelhna* chu hei hi a ni e –

- i) Kum 2023 MLA inthlan hma lawka Rajiv Gandhi Stadium, Mualpui artificial grass-turf thlakna (re-installation) ah khan engzat nge sen a nih?
- ii) Heta tan hian sanction a awm em? Eng fund atanga thawh nge?
- iii) Tender chhuah a ni em? Chhuah anih chuan, *open tender* nge, *restricted tender*?
- iv) Engtikah nge hnathawh tan a niha, engtikah nge thawh zawh a nih?
- v) A contractor' tunge ni? tih te kha a ni e.

HON. SPEAKER : A theih ang anga chhang turin Sports & Youth Services ... (**Pu C. Ngunlianchunga:** Laptop khan a hliah deuh che em maw ni le? Vawi thum vel ka phar a; a question neitu ka ni a, ka zawt belh thei ang em le?)

I la leh hram ang u. Question neitu a ni a, a phar bawk si a. Ka lo hmu lo a ni, min ngaidam teh. Awle, han sawi rawh le.

PU C. NGUNLIANCHUNGA: Pu Speaker, i hmaa mi kha a lian deuh hlek a, keini tlar hma ho hi min hliah em maw ni... (**Hon. Speaker:** Chuvang pawh a ni chiah lo. Ka hawi kual ngun viau a ka hmu fuh lo tlat che.) Ka *zawhbelhna* chu - Kan Sports Minister kha thar lam mai a ni a. Hei hi sawrkar hmasa thil tih a ni a. A hna kha State Sports Council Engineers ten a khat tawkin an va tlawh ve zeuh thin a. Hna saw a chhe em em mai a ni. Pavillion pathum an sa a, pakhat phei chu khawtlang YLA ten sub-contract in an la ve a, pawisa pawh an la pe tha lo leh nghal a. Khami 'MS Decor' tih ho phei kha chu an thawk chhe khawp a, an sawi danin. Nimin lam thleng pawh khan kan inbia a.

Chuvangin, kan Sawrkar thar hi a lawmawm kan ti a, Governor Speech-ah pawh kan sawi a; *Mizoram State Project Monitoring Committee* khan 'hna a en dawn a ni' tih te kan hria a. Kha committee khan PMJVK, a bikin Lawngtlai district chhung Mampui-ah sports infrastructure cheng nuai sangnga chuang man a awm a, a chhak lawk Lawngtlai College Veng-ah cheng nuai sangthum leh tih man a awm bawk a, a

bul lawk Lawngtlai-I ah pawh sum tam tak senna a awm bawk a ni. Vawiina ka zawhnaah hian cheng nuai 914 man a ni a, hetah hian nuai 877 pek a ni tawh a. Amaherawhchu, a hna chu, pavillion te phei chu an sawi dan chuan – ‘ruah sur se, players ho tawmna atan pawh a tlak loh; tuin a theh vek dawn’ an ti a ni. Tin, bathroom leh changing room ang chi te pawh ‘a tha lo hle’ tih a ni a. Chuvangin, kan House Leader zahawm tak pawh ka ngen duh chu - amah chairman-na hnuai a ni bawk a, “*Mizoram State Project Monitoring Committee* khan he project hi min ensak thei ang em?” tih kha ka zawhbelhna a ni a. Tin, heta hna tha lo hi State Sports Council hian “engtin nge hma lak a tum?” tih kha ka zawhbelhna a ni e.

HON. SPEAKER : Chhang turin Sports & Youth Services Department Minister Pu Lalnghinglova Hmar ilo sawm ang.

PU LALNGHINGLOVA HMAR, HON. MINISTER: Pu Speaker, Hnahtial Bialtu Pu Jeje Lalpekhlua zawhna chhanna chu - ‘Sports Association’ tihchangtlun te, infiam-mite hmasawna lam hi tun tuma sawrkarin a kalpui tum dan a ni a. State Level Competition te District Level Competition te leh a tam thei ang inelna kalpui tum a ni. Amah ngeiin a sawi ang khan, hetiang hian experience min pe a, hmun danga che chhuak tur pawhin min tuaihriam thin a ni. Chuvang chuan, Sports Association te *Incentive Cash Award* mimal hnena kan pek ang deuh hian Sports Association tithate hnenah lawman pek theih dan tur te pawh ruahman tum a ni a. Tin, inelna tam zawk pawh siam tum a ni a, chu lamah chuan rilru kan sawr bing deuh dawn a ni.

Tipa bialtu Pu K. Hramo zawhna – Artificial grass-turf phah tum chungchang kha, tum loh thu a awm lova; hei, kalpui mek a ni a; dil mek te pawh a awm bawk a. Amaherawhchu, State Sawrkar sum ni lova tih hram hram tum a ni a, chutiang tur chuan ruahmanna siam a ni a. Tunah hian dilna thlen mek a ni a, Union Sports Minister nen pawh tun hnaiah kan inbia a, min pek ngei rin a ni a. Amaherawh chu, rin thu a nih laia chiang taka han sawi hi House zahawm takah chuan hun lovin ka hria a. Chuvangin, a huna te kha sawi a la remchang rih lo a ni e.

Pu VL Zaithanzama, Aizawl West-III Bialtu zawhna – “Rajiv Gandhi Stadium-ah tun hnai lawka artificial turf phahna atan sum sen zat” tih kha, Mizoram State Sports Council chuan a hriatpui lova. Mizoram State Sports Council hi, Pu Speaker, sports infrastructure buaipuitu a ni a, Sports & Youth Services Department ni lovin. Mizoram State Sports Council kaltlanga phah a ni lova, sanction zat kan hre lova. Tender chhuah a ni lova, open-tender nge, restricted tender pawh kan hre lova, hna thawh tan hun hriat a ni lova. Official chuan, a contractor pawh hriat a ni lova, official lova sawi theih titi chuan a awm a. Amaherawhchu, ziaka chiang takin sawrkarin chhiahchhiahna a neih loh avangin House-ah hi chuan kan sawi thiang lova. Chuvang chuan, administrative approval emaw, tender emaw, expenditure sanction emaw kha sawrkar ang chuan a awm hran lo a ni..... (*interruption*)

PU ROBERT ROMAWIA ROYTE: I sawi laklawh viau nain, kan zavaia hriat atan a thain ka hria a; Pu Speaker, i phalnain. RG Stadium-a phullem phah khu, ni e, Zobawk-a kan sports academy atana phul lem dah sa kha a chhiat mai dawn avang leh, court pawhin an ngai thei lo em em mai a; court in a *stay* lai a ni a.

HON. SPEAKER : Ngawi lawk ru aw. *Zawhna & Chhanna* hun a zo a; kan sawi zawh tir law law dawn em ni ang? (House-in a sawi zawh law law a remti a.) Aw le, sawi zo law law se.

PU ROBERT ROMAWIA ROYTE: Tichuan, sawlaia dah saw, a dahsawna mai tur a awm lova. Chutih mek laiin RG stadium khu, (hei, Minister zahawm tak pawh hi a hrechiangtu a ni a) I-League leh National Level Competition khelh nan an rawn phal ta lova, a phul a kawlh tawh lutuk avangin. Khatiang National Competition ang chi, hei, tunah pawh *Khelo India* an inkhel zo deuh chiah a, a hmam I-League khelh mek laiin thlak turin min ti a; chuti anih loh chuan, “home-ground tur State pawnah ngaihtuah ni sela” an ti a. Kha kha Mizo-thalaite tan a rilrunat-thlak dawn a. Chuvang chuan, Sawrkar atangin Director ah ‘*administrative approval*’ ti mai ila, lehkha pawh fel taka siamin, “Zobawk-a phul lem hi RG stadium-ah phah phawt mai nisela, a tul ang - *further necessary action* pawh lo la turin sawrkar atangin Director-ah hriattir a ni a.

Inthlan dawn hnaih tawh kha a ni a, keini Aizawl-ah kan awm reng tawh lova; ‘engtin nge hma an lak zel’ tih kha chiang tak chuan ka hre lo na a, ka hriatpui chu, nichina Pu Tetea Hmar, kan Minister zahawm takin company a sawi MS Décor Ltd. te khan Mizoram chang ni lo, “North East Football field hi chu an khawih deuh vek a ni” tih kha kan hre thovin ka ring a. Chuvang chuan, ‘kha kha in lo khawih ve mai thei em’ tiin keimah ngei pawhin ka zawt a; “a rate chu nakinah quotation zawngin emaw, engtin emaw sawlaia mi suan phei na-na-na chu *public interest* a lawm maw le” te ka han ti a.

Tin, MFA lama kan hotute nen pawh kan inrawn a; “hetianga kan tih loh chuan, national competition chi reng reng hi kan thleng thei tawh dawn si lova” ka ti a, ‘a tha a lawm’ an ti ve a. Chutiang chuan *in-good faith* in kan ti a chu chu, he House hian kan lo hriat ve atan pawh a tha a. ‘Thil fel lo’ ti mai ila, ‘fel lo awmlo’ ni lovin, formalities kim lo tam tak a awm tih ka hria a, kan Minister pawh hian a hriain ka hria a. Minister zahawm takin a rawn tifel turah ngai ila a tha awm e.

PU VL. ZAITHANZAMA: Pu Speaker, department hriatloha thil kal vak vak kha, zawngchhang chi a va ni lo em!

HON. SPEAKER : Engpawh ni se, a concerned minister a la ding a, han sawi chhunzawm zel se la.

PU LALNGHINGLOVA HMAR, HON. MINISTER: Pu Speaker, a lunglenthlak khawp mai; ka lo nghak vang vang a ni. Nichina kan chhan tak ang khan, Pu Speaker, a khawihtu tur chu Mizoram State Sports Council a ni a, a dang zawng pawh kha an khawih a. Amaherawhchu, tun tum bik chu, a hmanhmawhthlak bik nge ni; kan hun hma lam kha a ni a. A ziakin engmah a awm lova expenditure sanction te tender te a awm lova. Tin, a contractor pawh kha tuna a sawichhuah kha official a kan hria (official a ni dawn em ka hre lova) chu a ni mai a. Tun dinhmunah chuan, ‘a hmanhmawh thlak avanga thawh a ni’ tih kha ka han chhan theih chu ni mai se a tha awm e.

Tichuan, Pu Speaker, Lawngtlai West Bialtu - Pu C. Ngunlianchungza zawhna chungchang kha; zawhna ai mahin rawtna a ni deuh a. ‘Hna a chhia’ a tih kha, cheng nuai 871.73 chu Ms Décor, Guwahati a mite hian an lo hmang tawh a. Engpawh ni se, Pu Speaker, hun kan nei lo em a, mimal tak pawhin, “Mizoram State Sports Council President ka nih angin, a hmunah ka kal ang” tih he House hi ka hriattir duh a. Hei chang lo pawh hi tuna kan han sawi tak ang khan, PMJVK hnuaiah hian hna hrang hrang thawh a awm nual a, Basketball court cheng nuai 102 chuanga sak eng emaw zat a awm a, Volleyball court cheng nuai 31 a sak te. Hengte hi kan han lakhawm mek a, kan endik mek a. Sawrkar hmasain tha taka infrastructure a lo din tawh hi a zia ang ngei a tha taka an hlawhtlin theihna tur leh, a hmawr an bawk ngei theihna turin hmalak kan tum chho dawn a.

Nichina kan sawi ang khan, ‘Decor India Ltd.’ bik hian ... (**Pu Robert Romawia Royte:** Pu Speaker, leh lawka. “State Monitoring Committee-in a endik” tih kha, a tha ka ti khawp mai a, keipawhin; ka sulhnu-hluite a nih avangin. Keima va hawn a ni a, ka hmuh chin chu tha viauin ka hre mai a. ‘ruah theh’ tih kha chu, lammual pawh hi i kal ngai lo a ni maithei a, Lawngtlai West Bialtu kha. A bang neilo a nih avangin ka hnenah pawh hian an sawi thin a, chu chu ka rawn support e; committee in a en kha ka support e).

A lawmawm dawn khawp mai; kan en ho thap thap dawn a ni. Kei pawh ka la thlen phei loh avangin a dinhmun tak hi ka la hre lova. Tichuan, tuna *Décor India* bik hian project hi 14 lai a khawih a, thenkhat chu tha tak takte pawh a awm ang a. Chuvang chuan, an ni chang lo pawh, hei, hnathawk hi an awm thluah a; hengte pawh hi Pu Speaker, a tul angin kan en ho zel dawn nia. Ka lawm e.

HON. SPEAKER : Tikhan *Zawhna & Chhanna* hun kan zo dawn ang a. Thil pakhat han clarify leh lawk ka duh chu - DC & MA chungchanga ‘office of profit’ tihah khan, disqualify theitu chu *Governor* a ni a, ‘dual-membership’ chungchangah chuan, *Speaker* a ni. Kha kha membrete kan chian a tha.

LAYING OF PAPERS:

Aw le, tunah chuan, *Laying of Paper* ah kan kal ang a. Pu Lalduhoma, kan House Leader (Chief Minister zahawm tak ni bawk) in “*The Fourth Annual Report, 2022-2023 of the Mizoram Lokayukta*” chu House dawhkanah rawn lay se.

PU LALDUHOMA, HON. CHIEF MINISTER: Pu Speaker, i remtihna leh he House remtihna in ‘*The Fourth Annual Report, 2022-2023 of the Mizoram Lokayukta*’ hi he dawhkan ah hian ka dah e.

HON. SPEAKER : A copy sem ni se. (*A copy-te sem a ni a...*) Kan chang kim em aw? Kan chang kim a, a lawmawm e.

PRESESENTATION OF REPORT:

Tunah chuan *Presentation of Report* ah kan kal ang a. Dy. Speaker zahawm tak, Chairman, House Committee ni bawkin, “*The First Report of House Committee*” chu House-ah rawn present turin ilo sawm ang.

HON. DEPUTY SPEAKER : Pu Speaker, i phalna leh i remtihna in, Mizoram Legislative Assembly vawi 9-naa House Committee Report hmasa ber - “*Amendment of Terms and Conditions lay down in the First Report of House Committee presented to the House on March, 2012 for the allotment of Conference Hall and Banquet Hall, Mizoram Legislative Assembly, Annexe Building*” tih chungchang hi he House zahawm takah hian ka rawn present e.

HON. SPEAKER : A lawmawm e. A copy kha han sem ula. (*A copy-te sem a ni a...*) Kan changkim maw? Aw le; a lawmawm e.

OFFICIAL RESOLUTION:

Tunah chuan, business dangah kan kal ang a. Vawiin hian *official resolution* pakhat kan nei a, resolution neitu chu, Home Minister zahawm tak Pu K. Sapdanga a ni a. Tunah move turin ilo sawm ang u.

PU K. SAPDANGA, HON. MINISTER: Pu Speaker, i phalna leh he House zahawm tak phalnain, *Official Resolution* he House zahawm takin a pawma tana ka rawn putluh chu - “*Central Sawrkarin Free Movement Regime (FMR) tihtawp a tum leh, Myanmar nena kan inrina Border Fencing kalpui a tum hi tha kan ti lova, chu chu ti lo turin kan ngen a ni. “Dik lo taka British Sawrkarin Divide and Rule Policy hmanga Zofate min thendarh hi, rorelna pakhat hnuaia kan kun leh theihna turin hma min lakpui zawk rawh se” tih a ni.*

Pu Speaker, House zahawm takin a a pawm tura ‘*Official Resolution*’ ka rawn putluh - *Free Movement Regime* leh *Indo-Myanmar Border Fencing* chungchang hi mitinin kan

ngaih ven leh kan vei a ni a. A tha zawngin emaw, a tha lo zawngin emaw sawi zui a hlawh rei viau thei a. House member leh Zofa khawvel hmuntina mite'n an lo chhinchhiah a tan, tawi kim thei angin sawi thain ka hria a, i hriatthiamna pawh ka rawn dil hmasa e.

A kamkeuna a tan Pu Speaker, Zofate hi khawchhak atanga lo tla thla, tuna India, Bangladesh leh Myanmar te ramri hrang neia an awm hmaa henglai vel tlang hrang hrang bawha mahnia ro in rela lo khawsa thin kan ni. British-in min rawn runa min rawn awp khan, awp beh kan awlsam nan min then darh ta kha a ni a. Hnam khat ni ta chu rorelna pakhat hnuaiia kan awm min duhsaktu anmahni British mite zingah pawh khan an lo awm ve tho mai a.

Kum 1982, January Ni 29 khan Kolkata ah *Chin Lushai Conference* koh a ni a, kha conference-ah khan Zofate ram khat leh rorelna pakhat hnuaiia kan awmna turin thutlukna siam a lo ni nghe nghe a. Amaherawh chu he *Chin-Lushai Conference* thutlukna siam hi tihpuitlin a ni ta lova, waviin thleng hian Zofate hi then darhin kan awm phah ta zel a. Sap hovin min tinsan khan, a then Burma (tuna Myanmar ni ta) ah, a then India ah, a then East Pakistan (tuna Bangladesh ni ta) ah te hian ramria daidanin min thendarh ta a ni. A pawl tak meuh meuh a, engtik niah emaw chuan he *barh luih-ramri* hi tihbo a la ni ang a, Zofa zawng zawngte hi rorelna pakhat hnuaiia kan la awm ngei ang' tih, Zofate zawng zawng thilungah beiseina nung a cham reng dawn a, a mit hauh lovang. Chutiang chu Zofate rilru a nih laia, he *barh luih-ramri* chawinuna, tihngheh lehzualna tura hmalakna chi reng reng - *Free Movement Regime* tihbo emaw, *border fencing* pawh Zohnahthlakte tan thlawp theih a ni lova, dodal zel hi hnam anga kan mawhphurhna a ni.

Border Fencing bik chungchangah hian he House zahawm tak thu leh hla hnuhnung ber chu, kum 2017, March Ni 10 khan tuna kan Leader of Opposition, Member zahawmtak Pu Lalchandama Ralte'n Private Member Resolution a putlulh "*Border Fencing hi Indo-Bangla chauh ni lovin Indo-Myanmar pawh fencing turin Central sawrkarah nawr ni rawh se*" tih chu he House hian a lo pawmpui tawh a nih kha. Hemi hma kum 2001, March Ni 23 khan, khatih laia House member (tuna chatuan ram min pansan tawh) Pu C. Sangzuala khan "*Mizoram Internation Border Fencing siam turin Central Sorkarah thlen ni rawh se*" tih Private Member Resolution a lo putlut tawh bawk a, he House zahawm tak hian a lo passed tawh bawk a ni.

Engtizia emaw ni, hnam party-a invuah, party office-ah pawh '*Hnam Run*' tia chhal ngat te hian chhak leh thlang ramria kan unaute nena zalen taka kan inkalpawhna hi an lo ngaimawh em em a ni mai thei a. Thir-banga hunga min lo daidan sak turin Central Sorkar-ah hian tumhnih ngawt an lo ngen tawh a, he House ah hian tumhnih ngawt an lo passed tawh a ni. A mak hle mai a.

A vawihnihnaah phei kha chuan opposition member-te, (khatih laia ZNP member-te) tuna kan House Leader ho hian pass ve duh lovin an lo chhuak nghe nghe a nih kha. Heng hnu ah hian *border fencing - duh lohna* hi House pawnlam-ah chuan Resolution siam a awm a ni awm e, House thutlukna House pawn lama tanga dodalna siam kha eng anga chak nge sawi theih a ni lova. Vawiinah hian he House zahawm taka member-te hian House chhungah ngei hian lungrual taka ngaihndan siam sawrkar chuan thain a hria a, he resolution hi putlulh ani ta a ni.

Free Movement Regime tobul leh kalphung sawi dawn hian figure a tam deuh a, khawngaih takin member-te in lo chhinchhiaha tan, (kei leh kei lo angin muang charhin ka han sawi ang e.) Kum 1885 atanga 1937, kum 52 lai chhung kha India ram leh, kha tih laia Burma ram hi *British Colonial Administration* hnuaiyah ram pakhat angin kan awm thin a. Hemi hma kum 1826 khan British-in Burma a run a, *Treaty of Yandabo* chu kum 1826, February Ni 24 ah ziah a ni a, hei hi British-in Burma ram a awp tan kum a ni. Burma rama chengte'n sapho awp nih chu an duh bik hauh lova. Kum 1852 leh 1885 ah *Anglo-Burmese War* vawihnih a awm a nih kha. Heng induna ah hian British chuan Burma chu hnehin, kum 1885 a tang khan Burma ram pumpui chu British rorelna hnuaiyah a lo lut ta vek a. *Government of India Act, 1935*-a a lan dan chuan, Burma chu Ni 1.4.1937 atang khan *British India* atangin lakchhuah a ni a. 'British Burma' tih hming puin British Colony hranin a lo awm ta a.

Hetia ram hrang anga India leh Burma kan awm hnu, (independence hma si, kum sawm chhung vel zet) 1937 atanga 1947 vel khan ramri tawn ve vea cheng tlang-mi (tribal) te chu hnam khat, chi khat, culture pakhat, sakhua pawh inang nei an nih avangin, British Sorkar khan ramri ti danglam si lovin awlsam zawka an inkalpawhna hi a lo siamsak tawh hrim hrim a. Hei hi kum 1947 – India-in zalenna a hmuh hnu leh, kum 1948 – Burma-in zalenna a hmuh hnu pawh khan chhawm chhoh zel a. India Sawrkar pawhin Ministry of Home Affairs hnuaiyah 1950, September Ni 26 khan *notification* a lo tichhuak tawh a, he notification copy hi Mizoram Sorkar - Home Department hian kan lo la nei hauh lova, tlai khaw hnuah Central Sawrkarah dil mek a ni a, minrawn pe thuai turah kan ngai. He 1950 notification luahlan tur hian notification dang Central Sawrkar hian 1968 June Ni 28 khan a siam leh tawh nghe nghe a. He notification tharah hian ramri atanga boruaka teha, km 40 chhung ve vea chengte tan *passport* leh *visa* ngai lova inkalpawh theihna tur ruahmanna a chuang a, ramri, Tiau atanga tehin, keini lamah chuan Keihfang khawdai thleng hi a ni. Notification hmasa 1950-a siam pawh kha, ramri tawn ve vea chengte inkalpawh theihna tur ruahmanna tho a ni ngeiin a lang. A copy kan dawn hunah kan hre chiang ang chu.

Tun hnai, kum 2010, July Ni 21 khan notification thar a lo chhuak leh a, he notification hian inkalpawh phal chin *km 40* ni thin kha *km 16* ah arawn pawt tawi ta duai a, a hma aiin km 24 zeta tihzim a nih tak avangin, ramri atanga rawn teh thlakin Khawzawl dai a thleng ta chauh a ni. Tun hnaiah hian Sawrkarin '*Look East Policy*' leh '*Act East*

Policy’ a rawn hman hnu phei hi chuan notification awmsa te khi duhtawk mai lovin, India leh Mynmar te inkarah *bilateral agreement* hial signed a lo ni ta a. Mynmar khawpui Naypyidaw ah 11.5.2018 khan, khatih laia India External Affairs Minister, Mizote’n kan hmelhriat em em - Pi Sushma Swaraj leh Mynmar Labour & Immigration Minister, Pu Theingsu ten an ram ve ve aiawhin an lo signed fel tawh bawk a ni. He thuthlung an ziah hi official chuan ‘Land Border Crossing Agreement’ tia hming vuah a ni a, sawi dan lar ta mah zawk erawh chu ‘FMR - Free Movement Regime’ tih a ni. He agreement hi Parliament lamah dan siam thaa delhkih a ni lova, *gazetted notification* tihchhuah pawh a awm chuang lo; guideline erawh mumal taka siam a ni a, Ministry of Home Affairs hnuia *meeting minute*-ah te, ram-pahnih inbiak tawna lehkhaah te chuan, ‘*Free Movement Regime*’ tih tawngkam hi chu hman a ni thin. Free Movement Regime a nih khan zalen takin khawlai ang maia ‘*duh duha inkalpawh theih*’ tihna a ni lova. Ni 5.11.2003-a siam tawh guidelines-a a landan chuan, ramri hnaia awm, Sawrkar hminga phalna siamsaktu ruat a ni a, ramri kan duhte chuan phalna an la tho thin a ni. Hetia India Sawrkarin a tih ang chiah hian Burma Sawrkar pawhin a ti ve a. Chutiang chuan, India leh Burma ramri-hrula chengte chu a khawi lam lam pawh passport ngai lovin an inkalpawh mai thin a, zan riah ei erawh chu phal a ni lo.

FMR kalphung leh a taka hman dan hi Cental Sawrkar hian a rawn ngai thutak zui ta hle a, Ni 11.8.2017 khan *Ministries of Home Affairs* hnuia Internal Security, Special Secretary kaihhruai *Committee* a din ta hial a. He Committee hian FMR kalpui dan tur - *Standard Operating Procedure* (SOP) a siam a. SOP ah chuan border pass issue dan tur te, luh leh chhuahna bik point ruat fel te, khua leh tui rinawm an nih infiahna - 100% Aadhar authentication te, Indo-Mynmar border vel khuaa awm zawng zawngte *database* siam te leh, a dangte a tel a ni.

Mizoram sawrkarin FMR a bawhzui dan, Council of Ministers meeting (Ni 22.10.2003) thutlukna angin, Mizoram sawrkar chuan – ‘*Guidelines for regulating entry of Mynmarist tribals into Mizoram*’ tih chu a siam a, Mizoram Gazette Ni 12.11.2003 ah tihchhuah a ni. He guidelines ah hian – “FMR chu Indo-Mynmar ramri atanga a tawn tawna km 40 huam china mite chuan *Visa* emaw, *Passport* emaw hman ngai lovin, inkalpawhna tur ruat bik gate pali-ah an inkalpawh thei ang a, Police Station leh Outpost Officer in-charge ten phalna an pe thei ang” tih a ni a. Chung Police Station leh Outpost te chu –

1. Zokhawthar - Police Station (Champhai District) te,
2. Thingsai Police Station (Lunglei District) te,
3. Lungbun Police Outpost (Siaha District) leh
4. Phura Police Outpost (Siaha District) te an ni.

Mizoram Sawrkar chuan he SOP ang hian hma a la chhunzawm a, hengte hi inkalpawhna gate-te chu an ni –

Lawngtlai District - Saisihchhuah, Hruitezawl, Zochachhuah, Laitlang;

Hnahthial District - Thingsai;
 Champhai District - Hnahlan, Bulfekzawl, Farkawn, Zokhawthar;
 Serchhip District - Sailulak, Lungkawlh;
 Siaha District - Chapi, Lodaw, Lopi, Phura;
 Saitual District - Teikhang te an ni.

Mizoram Sawrkar chuan FMR hman dan viltu tur *Committee* a siam a, *Principal Secretary*, Home chu Chairman a ni a; a hnu lawkah *Committee* din that a ni a, *Chief Secretary*-in a kaihruai leh ta a ni. Inkalpawhna permit hi Central Sorkar siam *booklet* mumal tak a awm a, Police Headquarters Mizoram pawhin copy 10,000 lai a dawng a, Passport Seva Division - Ministry of External Affairs thu angin, Champhai, Hnahthial, Lawngtlai, Saitual, Serchhip leh Siaha District SP-te hnenah semchhuah a ni. Mizoram Sawrkar Home Department chuan *border-pass* leh *entry/exit point* chungchangah hian hriatchian ngai thenkhat a neih avangin Ministry of Home Affairs hnenah Ni 27.8 2021 khan sawifiahna a dil a, chhanna erawh chu hmuh a la ni lo. *India Independence* atanga kum 75 chhung vel zet hetiang a Passport leh Visa ngai lova India leh Myanmar ramri tawn ve ve chengte'n awlsam zawka inkalpawh theihna kan lo neih hi, kawng hrang hrangin Mizoram hian kan tangkaipui hle a. Tun hnaia India Sawrkar-in FMR rawn tihtawp a tum ta mai hi, ngaihtuah chiang lova Manipur Sawrkar rawtna a pawm vang mai a nih a rinawm.

India Sawrkar hian FMR leh border-fencing tih a tum chhan media lama a lan dan chuan - national security chungchang te, smuggling of contraband items te, illegal immigration leh movement of insurgent thilte vanga ni. MHA (Ministry of Home Affairs) atangin special communication hi Mizoram Sawrkar hian tun thlengin a la dawng lova, news report te hi kan refer a ngai rih a ni. Ngun taka ngaihtuahin, hengte hi chhuanlam tling niin a lang lova, National Security ngaihpawimawh ni se, Myanmar nen chauha FMR kan neih hi titawp lovin, Nepal leh Bhutan nen kan inkara passport leh Visa tel lova inkalpawhna pawh hi an titawp ve tur ni awm tak a ni. Chutiang bawkin, India in ramri a neihpui zawng zawngte - China, Pakistan, Bhutan leh tuifinriat vaukam a neih zawng zawng pawh hi hung vek tho tur ni awm tak a ni a. Hetia duh lai bik te chauh thur chhuaka selective-fencing tih hi, National Security vang lam ni lovin, India Sawrkar hian a khua leh tuite zingah 'hrehawm taka hrem duh hnam bil a nei ta a ni mai awm mang e' tih palh awl a ni.

Hmarchhak bialah hian 1950 chho vel kha *Naga-insurgency* vanglai a ni a, 1960 chho vel kha *Mizo-insurgency* vanglai a ni ve leh a. Chutiang bawkin 1980 leh 1990 chho vel kha *Bodo-insurgency* vanglai a ni bawk a. Khatih hunlai zawng pawh khan FMR hi kalpui a ni reng a, 'hnawk' tih a ni lem lo. Tun dinhmunah North-East Area-ah insurgency awm mang lova FMR leh border fencing tih tumna hi hriatthiam a harsa a ni.

Tin, Myanmar leh India inrina border fencing tih tum ni ta se, ramri hrula cheng khawsak harsa tak takte tan harsatna nasa tak a thleng nghal dawn tih a chiang reng a ni. International border fencing hi zero-line atanga meter 137 huam chhungah hung tur a ni a, Myanmar nena kan inrina India ram rualrem loh zia a hmuna hmutu ka ni ve a. A rem lai laiah fencing tih a ni ang a, India ram zau tak kan chan ang. Kan ram lam chan - Tiau Lui kama zawl zau tak, buh leh thlai hmun chu hung pawnah a awm ngei ang a, ramri hnai khua ten ei leh bara an tawrh dan tur hi a rapthlak hle a ni. Khawthlang lamah Bangladesh nen kan inkar hung avangin khua, huan leh lo ram zau tak hmun hrang hrangah kan chan tawh a. India khua-leh-tui dik tak te'n nasa takin an tuar mek a; tun thlengin resettlement, rehabilitation leh compensation-ah harsatna chinfel a la awm meuh lo. Hetih mek laiin, khawchhak lama Zofate harsatna a thlen leh tur hi ngaihtuah nawn leh turin Central Sawrkar hi kan duh a ni.

A thu hrimin, kan ram hi ruahtui tlak tamna - *monsoon area* anih avangin, ramri hi hung pawh ni se, hun reilote ah hnim leh thingin a khuh thuai dawn a, enkawl zui a harsa khawp ang. Chuvangin, Myanmar leh India inkara border-fencing siam hi a lo thlawna sum tak tak senna tur, tangkai hauh si lo a ni dawnin a lang. Chuvangin, ramri hungna atana sum taktak sen ai chuan, ramri hnaia khua-leh-tui rinawm tak tak tlawmngai pawl te, CPO te hi an tha tichakin, thuam tha ila, dan bawhchhiatna chi hrang hrang vengtu atan thuam chak ila, sawrkar leh ramri chheh vela cheng mipui tam takte hian kan chhawr tangkai ang a, India ram impunkhatna atan pawh kan chhawr tangkai zawk ngei ang.

Kum 1990-ah East Germany leh West Germany daidangtu Berlin Wall chu chhutchhiat a ni a, '*Re-unification of Germany*' hlawhtling tak kan hmu a ni. Hetih laia India leh Myanmar inkara Free Movement Regime tihtawp tumna lo awm ta mai leh, *British barh-luih ramri* tih ngheh zual tumna, Mizoram leh Myanmar ramri km 510 zeta thui Central Sorkarin hung tura hma a la ta mai hi, Mizofate tan a na ngawih ngawih a ni.

A bul lama tarlan tawh ang khan, *Free Movement Regime* tihtawp tum thu leh Indo-Myanmar border fencing kalpui tum hi Central Sawrkar atangin Mizoram Sawrkar chuan ziaka dawn a la nei si lova. Mahse, Central Sorkar hian kaltlangpui a tum thu hi media hrang hrang leh Central Sorkar hotute thenkhat thusawi atangin chiang tawk viau ah a ngaih loh theih lova. A tak lo chang ta se, a khua-leh-tuite tawrhna a thlen dan tur hi Sawrkar-laipui hian a hriat lawk a tul a ni.

Kan Chief Minister hian Union Home Minister hnenah FMR hi tihtawp a niha, Indo-Myanmar border fencing hi kalpui tum a nih pawhin, Mizoram bik hi chu huam tir ve lo turin a lo ngen tawh bawk a nih kha. Ni 21.1.2024 khan NGO - coordination committee huaihawtin MFR leh border fencing dodal lantir nan Aizawl-ah mipui punkhawmna huaihawt a ni tawh a. Mizoram sawrkar leh mipuite'n he thil pahnih duh lova kan dodal rual hian, "central sawrkarin Zofate ram pathuma thendarha awm tawhte

rorelna-pakhat hnuaiia kan awm tlan leh theih nan ngaihtuahna sengin kawng min zawn sak sela, a tul ang zelin *international forum*-ah te pawh hma min lakpui se” tih hi Mizoram sAWrkar leh mipui duh dan a ni a.

Chuvangin, vawiina resolution ka putluh, ‘Sawrkarin *Free Movement Regime* (FRM) tihtawp a tum leh, Myanmar nena kan inrina border-fencing kalpui a tum hi tha kan ti lova, ti lo turin kan ngen a ni. Diklo taka Bristish sawrkarin *Divide and Rule Policy* hmanga Zofate min thendarh hi, rorelna pakhat hnuaiia kan awm leh theihna turin hma min lakpui zawk rawh se” tih hi he House member zahawm tak takte hian lungrual taka min pawmpui a tan ka rawn chhawp chhuak a ni e. Pu Speaker, ka lawm e.

HON. SPEAKER : A lawmawm e.

Awle, Minister-in resolution a rawn putluhna chhan fiah-fai takin a rawn sawi ta a, kan sawiho ang a. He resolution hi a kalh zawng, ‘A, a hun lo e; i ti rih lo mai teh ang u’ tih te pawh awm theih a ni a. A resolution thlawp lo zawnga sawi tur kan awm chuan, kan la hmasa ang a; a thlawp zawnga sawi duh te pawh kan awm tho ang a. Amaherawhchu, a tira kan sawi ang khan, business kan ngah ang reng a, a thlawp zawng te chu tam tak kan la hman lo turah ngai ila. Mi pakhatin minute 5 a sawi kha a tawh kan ti mai em? (*Rem tih a ni a.*) Awle, member pakhatin minute 5 zel an sawi turah ngai ta ila. Sawi duh awmte ban i phar teh ang u.

Aw le, member pathumin an phar a; tichuan, Leader of Opposition-in sawi tur a neih chuan kan sawm bawh ang a, kan House Leader kan sawm bawh ang. Tichuan, a resolution neitu wind-up turin kan sawm mai dawn nia.

Sawi hmasa turin, Pu Rasik Mohan Chakma kan sawm ang.

PU RASIK MOHAN CHAKMA: Pu Speaker, ka lawm e.

He official resolution hi a thlawp zawngin ka sawi dawn a, a chhan chu - kan hriat theuh angin, Indo-Bangla border-fencing a awm a, kan area-ah pawh an ti ve a ni. A thatloh zia leh a hlawkloh zia, sawlai-mi kan nihna angin kan hrechiang em em a ni. PMGSY - pilot project an siam dawn khan PWD hnenah proposal kan submit a, min hrih dan chuan, “Indo-Bangladesh border fencing road a kal dawn a, connectivity in nei dawn a. Chuvangin, PMGSY - pilot project atang khan i ti tel lo mai ang u” an ti a, kha kha an ti tel lova, connectivity kan neih loh phah a. Mahse, road an siam khan company te khan an hlawkna tur ringawt zawnga ngaihtuahin kawng te-tak-te, alignment leh grading chhe lutuk kha a ni a; khawvelah hian hetiang em ema grading chhia kawng kha a awm pawhin ka ring lo; chutiang chuan min siamsak a. Helam atangin khangte kha a dik leh dik loh enkawltu tur an awm si lova, Mizoram sawrkar a inrawlh vak loh avangin. Tun

thlengin connectivity hi, PMGSY - pilot project atanga min paih takah chuan kan neih loh phah a, a ram chhunga mite hian kan chan nasa em em a ni.

Tin, khami kawng kan hman dawn pawh khan BSF te khan, “hei chu patrolling na a ni a, thil dangah hman phal loh’ tiin, motor-ah khan harass an nei fo a ni. A tha lo lutuk a, an quality kha a chhe hle bawk a, a bik takin kalkawng a chhe hle a ni. Border fencing kha ‘150 yards from the zero point’ tih kha a ni a, thenkhatah chuan km 3-4 te fencing pawnah an dah a. Mizoram Sawrkar leh Central ah te lehkha kan ziak a, awmzia a neilo reng reng; chuvangin, Mizoram-ah ram zau tak kan chan a ni. Kan ram chante hi luikam area ami a ni a, vegetable products leh engkimah a tha em em a, khangte kha hmang tangkai thei lovin kan awm a, a pawl lutuk. A khua chawp chawpin fencing pawnah an dah a, ‘rehabilitation a awm lo’ an ti a, a khaw pawna awmte kha compensation pawh an pe duh lo; fencing leh road chauh, chu pawh te-takte. Compensation chu an pe a, mahse, a khaw pawna mite chu kha chu an pe duh lova, ‘in awm thei a lawm’ tiin min chhang mai zel a ni. Tin, fencing gate hi kha khaw-en chhung chauha hawn thin a ni a; zanlaih mitthi emaw, nau nei tur - nau vei emaw an awmin a manganthlak thin ni. Pu Speaker, fencing pawna awmte an treat dan kha a *inhuman* lutuk a ni.

Tin, lui te-takte teah culvert an siam a, water-logging kha a titam ta lutuk a, leilet tha tak takte kha tunah an siam thei tawh lo a ni, hmun tam takah chuan. Khangte kha compensation an pe duh si lova, “kan acquire hlei nem” tih te kha an chhan dan a ni a, reclaim turin pawisa an pe duh chuang lova. Tichuan, lui tam takah chuan water-logging atan a bang kha an siam ta ringawt a, hei hian thil tam takah harsat a thlen a ni.

Tin, sawlai international border-a lui awmte kan hmang tangkai thei tawh lova, tunhma chuan *one of the main sources of nutrition* a ni a, thingtlang mite chuan sangha te an man a, eizawna bakah nutrition hmuh nan sangha hi kan hmang thin a ni. Mahse, tunah erawh kan hmang tangkai thei ta lova, a lungchhiatthlak hle a ni. Chutih laiin a ral lehlamah Bangladesh ho kha chuan duh tawkin an hmang ve thung a ni. Tichuan, lui kama balu te pawh lak an phal lova, Bangladesh lam sipai ai chuan BSF ho hian min tibuai zawk mah mah a. Tin, Mandir atan te chuan ‘a lak theih’ an ti a, thil dang - personal construction emaw, contract hnathawhna tur emaw atan chuan an phal lova; development works kalpui hi a buaithlak khawp mai a, tunah hian.

He official resolution move tu hi hon. Home Minister a ni bawk a, ka han zawh du chu - engvang nge BSF ho khan balu te kha tui lakna tur atan an phal loh; lehlamah Bangladesh ho khan an hmang thei tho si a? Hei hi engvang nge min enpui se a thain ka hria; hei hi chu mipui-tawrhna a tling a ni. Pu Speaker, thil tam tak kha min harass nan an hmang mai mai a ni, BSF-te hian. He issue hi he House-ah chauh kan sawi lo, Chief Secretary hnuaia border fencing-a state level meeting-ah pawh ka sawi tawh a ni. BSF aiawhte pawh an awm a, an hnenah pawh a hranin kan thlen thin a, mahse, awmzia a nei lo. Tin, Home Ministry-ah *Border Management* Secretary hnen thlengin kan ziak a, mahse, tun thlengin a chhanna a la awm lo.

Tin, he Myanmar lam border-fencing an tih dawn tak tak a nih chuan, kan hriata tana tha chu - Mizoram state tan, kan mipuite tan hlawkna pakhatmah hmuh tur a awm lo; tawrhna, hrehawmna, ram tam tak channa tih loh chu. Cultural lamah chuan thudang pawh ni se. Resolution mover in a rawn sawi - British hovin ‘*divide and rules*’ hmanga kan tribal -te a bik takin Northeastern tribal-te hmun hran hranah min thendarh a, tun thleng hian political problem pawh, schedule tribe zawng zawngin kan neih phah a ni. Chittagong Hill pawh hi India rama awm awmtak, 90% non-muslim an ni a, khati chung pawh khan Pakistan-ah dah an ni a, khami hma daih - 1894 khan Chittagong Hill leh a surrounding areas te kha Pakistan-ah an bet ringawt a ni. Chuvangin, political leh cultural problem kha a siam tam lutuk a. Tunah hian India Sawrkar hian tireh zawngin hma la mah sela, a harsa tawh a. Chuvangin, he thil hi a nawra nawr a tul takzetin ka hria.

Pu Speaker, he resolution hi thinlung takin ka thlawp e. Ka lawm e.

HON. SPEAKER : Serlui Bialtu zahawm tak Pu Lalrinsanga Ralte ilo sawm ang a; *minute-nga* kha maintain hram hram i tum ang u aw.

PU LALRINSANGA RALTE: Pu Speaker, ka lawm e.

Vawinah official resolution tha tak mai sawrkarin a rawn pu lut hi a lawmawm hlein ka hria a. ‘Helaiyah hi duhthu sam lo’ emaw, ‘tawngkam mawi hman a tha e’ kan ti a nih chuan, a tha vek ang a. “Central Sawrkarin Myanmar nen a kan inrina border fencing kalpui a tum hi tha kan ti lova, tilo turin kan ngen a ni” tih lai hi, “kan do tlat” tih emawa dah a tulin ka hria a. Amaherawh chu, Sawrkar resolution te a nih chuan, tawngkam mawi te kan hmang turah ka ngai a. He *resolution* hi tha ka ti a, ‘ka thlawp tak zet a ni’ tih kha thuhmaah kan sawi duh a ni.

Pu Speaker, kan hriat theuh angin, keini Zofate hi India, Bangladesh leh Myanmar hmun hrang hranga awmdarh kan ni a. Tin, a bik takin he FMR - Free Movement Regime a vang hian ‘Chin Hill’ kan tih, khilai Burma lama kan unaute nen hian inkalpawhna tha tak mai nein, chhung leh khat leh unauah te, nupui-pasalah te innei tawnin, chhiat ni, thatniah te kan inpawh tawn thei a, ‘he FMR hi kan hmang tangkai takzet a ni’ tih hi ka thu-hmasaah kan sawi duh a ni.

Tin, ‘Greater Mizoram’ tih hi zofa ten kan tlangaupui thin a, tunah hian a takin la thleng lo mahse, kan thinlung chhungah hei hi vawng tlat ila; thang leh thar lo kal chho zel turah pawh “*Greater Mizoram* - Mizo fate, Mizo hnamte rorelna pakhat hnuaia kan awm theih nan” tih hi kan rilruah awm tlat se; hei hi ka rilruah a lian hle a ni. Thawk khat lai khan mipui-nawlpui leh NGO-te khan ramri hung duhin boruak te pawh an siam a; amaherawh chu, khang kha a hun mil zela tih anih avangin tunah hian han indem chi

ah ka ngai lova. He resolution pawh hi i vei lamte, i dinglam te hmingthat tumna lam ni lova, kan hnam tana rilru kan put tlan hi a thain ka hria a ni.

Tin, kan inunauna thang duang tak mai hi Manipur CM hian a hmu thei lo hlein ka hria a, tin Manipur Zo-Kuki te buaina namen lo an tawh a hnawh chhuah an tum vanglai tak, nikum Ni 23 Sept., 2023 khan Imphal-a press mite hmaah Manipur CM hian Central Sawrkarah FMR hlih leh ramri hung na taka a nawr thu a lo sawi tawh a ni. Chuvang chuan, Manipur Sawrkar duh dan anga he kan ram leh Myanmar inrina rawn tih tel vel zel a hi, Central hian ‘Manipur Sawrkar thu hi a la mah mah em aw’ ka ti a. Sawrkar tan pawh hian a tha nat thlakin ka hria a, a zahthlak lek lekin ka hria. Chuvang chuan, na hrek hrawka kan Sawrkar hian a do a tul tak zetin ka hria a ni.

Tin, kan CM zahawm tak, January Ni 6-a press mite hmaa a sawi te kan hre tawh a, ‘Delhi-ah zu kalin, he thil a duh lohna a zu thlen tawh a ni’ tih report te kan hria a ropui ka ti a ni. Tichuan, Prime Minister pawhin a lo ngaih pawimawh thu leh vawi tam tak inbiak a duh thu te kan lo hria a. Tin, kan Home Minister te nen pawh an innel tlang viau ni te pawhin ka lo hria a. Kan Foreign Minister phei chu a batchmate - a thianpa a ni a, he FMR leh ramri hung chungchanga thuneitute ber chu PM, Home Minsiter te leh Foreign Minister te an ni a. Chuvang chuan, kan CM pawh a tlangtla viauin kan lo hria a. He thil hi *Hnam-issue* a nih avangin he budget session kan neih zawh hi chuan kan CM pawh, a theih hram chuan kan ram, kan hnam tan Delhi ah tlan thla lehin, a batchmate - a thian tha leh kan PM pawhin zing taka inhmuh a duh bawk a, heng thil te hi zu sawi leh ta se. Kan ram leh Burma inkar hetianga ramri hung tur leh FMR hlih an rawn ti te hi an sut thei ngeiin ka ring a, ka beisei tlat a ni.

Tin, Pu Speaker, tuna a lan danah hian, Myanmar ramri State-te zingah Nagaland leh keini hi a hung duh lo kan ni a, Manipur duhdan ringawt kaltlang hi a dik lovin ka hria a. Chuvang chuan, na theh-thawha bei let hi tulin ka hria a ni. Tin, FMR hlih duh chhan nia an sawi tam ber a chu – ‘hel rawn luhka kan hawng awlsam’ tih te; ‘ruihhlo chitin reng, chumi khami’ te kan ti a. Pu Speaker, ramri te hungin FMR te hlip se, leh, ramri ah chuan sipai an duty khah tlat loh chuan (heng thil tam tak kan sawi hi diklo pawh ka ti lo), heng ruihtheih thil hrang hrang pawh a lo lut a ni thei e, heng hi kan do rem chuangin ka ring lo. Aizawl khawpui ah ngei pawh Police te, Exise te, NGO te nen ruihhlo dovin kan beia a, rem chuang lo. Chuvang chuan, heng kan inunauna, buaina leh harsatnaah pawh intanpui tawna, lawmna ah pawh inlawmpui tawna, unau anga kan kal chhohna hmu thei lova an mit a kham avanga he FMR thiah leh ramri hung rawn duhna niin ka hria a, pawi ka ti takzet a ni.

Pu Speaker, ka laklawh tlat a; a tawpna kan hnaih dawn ang a. Economy-ah pawh kan tuar hle dawn, khilaia FMR hlih a nih chuan. Tuna bawngsa kan hmuh leh thildang dang chhungkaw tinin kan mamawh thin ang te hi kan hmu thei dawn tawh lo a ni.

Chuvang chuan, a man te to in keimahni ramchhung ngeiah pawh buaina nasa tak kan tawh dawn a ni.

A tawp berah chuan, he official resolution a rawn tel ngei tura ka lo rin, mahse kan ziah tel loh, a laimu ni si hi awmin ka hria a. Helai '*bio-metric identification*' tih lai a hi ka rilruah a lian khawp mai a. 'FMR hlih' tih leh 'ramri hung' tih chung changah hian zohnahtlak buaina tawka kan ram himna zawnga lo kal te lo chhinchhiah hi i dinglama thute leh i veilama thute hian kan duh bik ka ring lova. Heng FMR hliha ramri hung a nih chuan, hei hi a rawn keng tel ngei ngei dawn. Chuvang chuan, heng kan unaute sahimna zawnga rawn raltlante hi chhinchhiah an nih chuan, awlsam taka manin thawn let an ni dawn. Hei hi a dik kan ti lova, Pu Speaker, i dinglama thute leh i vei lama thute hian '*dik lo*' kan ti a ni.

A tawp nan a kan sawi duha chu - MNF sawrkar lai pawh khan Central Sawrkar khan na takin a rawn nawr thin a ni, bio-metric identification ti tur te hian; mahse enganga na pawhin rawn nawr mahse, Sawrkar hmasa kha a tang tluan zak thei a, a tangtluan mai ni lovin, Central Sawrkar duh dan ang ti lo chung khan heng kan unau-raltlana rawn awmte puihna tur Central Sawrkarin Mizoram Sawrkar an rawn pe hial a ni. Chuvang chuan, tuna kan sawrkar thara kan CM zahawm tak kaihhruai pawh hian *pa thek-thawk*, duap tel miah lova he sawrkar hi kan kala, Ram leh Hnam issue ah chuan huaisen taka kan kal hi a thain ka hria a, I veilama thute pawh hian 'kan thlawp tlat dawn a ni' tih kha ka sawi duh a ni.

Tichuan, Pu Speaker, he Government Resolution hi tha ka ti a, ka rawn thlawp e.

HON. SPEAKER : A lawmawm e. Aw le, sawi leh turin (Election Commission lam hian 'Saiha' tiin an la dah a, mahse, 'Siaha' tiin kan lam ang a) Siaha Bialtu zahawm tak, Dr. K. Beichhua ilo sawm ang.

DR. K. BEICHHUA : Pu Speaker, ka lawm e.

Hei, Sorkar Resolution a rawn lut a, ka chhiar a, ka chhiar nawn leh thin a, ngaihtuahna thui tak min pe a. He border fencing chungchang hi, ka hriatsual loh chuan vawithum Sawrkar resolution anga a luhna a ni tawh a ni. A vawikhatna ah khan 'fencing tih ni se' tih kha sawrkar tanchhan a ni a, fencing tih a ni chuang lova. A vawihnihna ah, 'border fencing hi tih loh ni rawh se' tih a ni a, eng a awm chuang lova. Vawinah hian kan Home Minister zahawm takina a lo sawi tawh ang khan, he thu leh hla hi eng emaw atanga kan la hriat chauh a ni a, 'official-a hriattir kan la ni lo' tih kha a rawn sawi a.

Tin, kan CM zahawm tak pawh Delhi-ah vawihnih a zuk kal tawh a, Home Minister te pawh a zu sawipui thu kan hria a. Home Minister atangin positive taka *response* a dawng ni te pawhin kan hria a ni. Chuvang chuan, a thlamuanthlak rih maiin kei chuan

ka hria a. He thil hi ka ngaihtuah chet chetin, vawiinah hian kan u leh naute, kei, ka pa u ngei hi Myanmar sipaiah tanga a dam chhung khilai hmang zo a ni. A fate hi Myanmar lamah an la awm vek a, ka first cousin te an ni. Chutianga thisen zawmpui sawi tur tam tak kan member zahawm takte pawhin kan neiin ka ring a. Vawiinah hian ‘he thil hi he House a lo pass thut-thut chi a ni dawn nge, ni dawn lo’ tih te pawh hi ngaihndan sawi thiam har ka ti a.

Ka sawi tawh ang khan vawithumna, vawithumah vawihnih, Pathian zarah ka tel ve thei a ni. Chutah chuan kan kal chhoh zelna tur hi ka ngaihtuah a. Vawiina he rorelna sang taka thutlukna kan lo siam hi, ‘vawiina lo siam chi a ni nge, ni lo’ tih keimaah chuan zawhna lian tak a la awm a ni. Chutih lai chuan he dinhmun hi ka ngaihtuah a. Vawiinah hian u leh nau, nu-hmun, pa-hmunte pawhin khata awm reng thei kan nih loh hun a lo thleng thin a, tichuan in-hrang te kan chang ta a. Chutiang chuan inhmangaih takin, ‘in-hrang kan chan tak avang khan u leh nau kan nihna kha a bo ta a, kan thisen inzawmna a bo ta a’ tihna a ni miah lo a ni. Chutianga in-hrang, lo-hrang kan lo neih takah chuan pangngai takin, kawngka atanga inlen pawh mai ni lovin, kawngkapui atangin mawihnai taka inlen pawhin, kan inhmangaihna kan tilang a ni.

Chuvang chuan, vawiina kan Zoram dinhmun leh Myanmar dinhmun ngaihtuah hian, ‘eng tianga kal hi nge tha ang; tha lo ang’ tih pawh sawi thiam a har ka ti a. He resolution hi ‘ka support e’ ti i la emaw, ‘ka support lo e’ pawh ti i la, “*Kela, be-be mah la, ka talh tho-tho ang che,*” tih ang deuh kha kan ni a. Kan pass dawn tho tho dawn tih chu a chiang mai a. Mahse Zoram-mipui hian vawiinah hian ‘kan ngaihtuahna i hmang zel teh ang u’ tih hi he House atangin, Pu Speaker, nangmah kaltlanga kan insawmna ni se. Vawiinah hian kan ram dinhmun chu kan hria a, a mipui-nawlpui ti-ti te leh social media-a kan thalaite thu leh hlate hi ngaihtuah ta i la - Vawiinah hian kan ram hi a dam em? Vawiin anga kan kal zel hian kan ram hi eng chen nge kan kal ang? He ram leh hnam, Zofate hi eng chen nge kan dam khaw chhuah ang? tih theih tur khawp *question lian-pui* a awm a ni. Chu chu ‘eng vang nge?’ kan tih chuan, vawiina he kan rama a mipui-mimir kan ti-ti leh social media-a kan hmuh leh thil dang dang atanga information kan dawnte ngaihtuah hian, kan thalaite hi ruihhlo avang hian kan pul phuk-phuk a ni tawh lo maw? Heng te hi ngun takin i ngaihtuah teh ang u.

Vawiinah hian ram hi developed tak, changkang tak, kawng engkimah thangduang tak ni mah ila, kan fate, kan thalaite an thih phuk-phuk si chuan eng nge sawt ang? Chumi piah lamah chuan, vawiinah hian kan ramah hian drugs vanga tuar mek ang zat hi ram dang mite’n kut an lo thlak avanga tuar ni ta se, vawiinah hian nang leh kei hi kan awm hle-hle hian ka ring lo a ni; ‘Khawng’ tia kan chhuah ka ring a ni.

Chuvang chuan, he resolution hi ngun takin ka ngaihtuah a, ka chhiar tam poh leh ka ngaihtuahna a kal thui tulh-tulh thin a. A eng hi nge tha ber ang? Vawiinah hian ramri hi lo hung ta se tih member te’n an lo sawi a, a dik viau. Chutih lai chuan, side A leh

side B - merits leh demerits te pawh hi kan thlir a tulin ka hria a. A hung chungchang te pawh kan sawi a. Kan ram chu tlang ram a ni a. Contractor te'n hlawk an duha, eng emawa straight taka fencing a kal chuan, ram kan chan tur pawh tam tak a awm thei a. Chuvang chuan, he hungna te pawh hi lo awm ta se, ka hriat sual loh chuan km 3 danah gateway awm tura duan a ni a. Chuta gateway – luh-chhuahna dik tak, hawihhawm tak leh dan dik taka kan luh-chhuah chu kan himna tur a ni dawn lo em ni? Vawiinah hian duh duhnaa kan luha, mi hmuh lohna atanga kan luh ruk thin avang hian a ni lo em ni vawiinah hian kan ramah ruihhlo te, smuggling te, human trafficking te, arms and ammunitions tawlh rukna tam tak te a awm? Chuvangin, vawiinah hian Pu Speaker, he resolution hi a zahawm a. Kan Home Minister, a rawn puluttu pawh a zahawm ka ti a. (**Hon. Speaker:** Minute 3-in a pel ta; i zo thei tawh em?)

Pu Speaker, a lawmawm khawp mai. Group Leader hi, kan tam emaw kan tlem emaw *Group Leader* kan ni a. Chuvang chuan, term hmasaah te phei kha chuan minute 15 kan inpe thin a, chu chu i tih chhunzawm ve ka beisei tlat.

Chu chu kan dinhmun a ni a. Chuvang chuan, Pu Speaker, vawiinah hian he resolution hi House-a lo pass mai chi a la ni em? *A buana hmaa lo kherh* te pawh hi awm thei a ni a. Official-a engmah hmuh kan nei bawk si lova, ti-ti thuthang - social media leh chanchinbu vela kan hmuh hi a la ni rih mai a. Chuvang chuan, eng pawh ni se, hei hi chu, “tunah rih chuan a la hma deuh hlek lo maw” ti ta ila, nakinah hian “kan khawtlai ta, nangmah vangin” min tih leh si te pawh a hlauhawm ve tho bawk sia. Chuvang chuan, helaiah hian ‘ngaihtuahna uluk taka he House leh Zoram-mipui hian kan hman a va tha dawn em’ tih hi ka lo din chhuahpui a ni e. Ka lawm e.

HON. SPEAKER : A lawmawm e. Kan Group Leader a ni a, minute 10 dawn te a han sawi a. Kan sawi ang khan Group Leader te hi chu ‘an intithu deuh’ ti i la a tha mai awm e. Aw le, kan la sawi leh zel dawn em? *Against* zawnga sawi kan awm awm lem lova, *minute 5* erawh chu maintain hram hram i la. Thil pawimawh, thil sensitive a ni a, sawi kan duh tlangin a rinawm a.

Tu tu nge sawi leh ang le? Ban i han phar teh ang? Member pali atangin kan la leh ang a, tichuan kan duh tawh ang u aw. Hachhek Bialtu zahawm tak, Pu Robert Romawia Royte ilo sawm ang.

PU ROBERT ROMAWIA ROYTE: Pu Speaker, ka lawm e.

Vawiinah Sawrkar - official resolution kan Home Minister zahawm takin a rawn pulut a. Tin, a background te, he resolution a tulna te thiam tak leh chipchiar takin a sawi tawh bawh a, ‘pass a nih hmel deuh em aw’ tih chu rilruah chuan a awm deuh a. Mahse, he thil hi a pawimawh em avangin, ngaih pawimawh zawng tawi te han sawi ve ka han duh a ni.

Pakhatnaah chuan, *Free Movement Regime* hi Myanmar leh India inkar mai thil a ni lova, tun hma atang tawh khan hetiang ramrite inkalpawh duha *free movement* siam hi an tam mai tih kan hriain ka ring a. Europe-ah te, African countries-ah te, Asian ngei ah te pawh hian FMR system-a inhriatthiamna nei ram hi an tam a, a chhan chu, a tawn tawnin an hlawkpui a ni. He FMR hi Mizo hnam anga kan unaute nena kan inzawmna a ni a, a pawimawh em em a, a area an tizim hret te hi a pawi a. Chuti laia thiah tum a, social media leh PIB press note-ah te pawh Home Ministry chuan a decide tawh thu kan hmu a, ‘tih an tum ngei a ni’ tih hi chu rin ngam a thain ka hria a. Chuvang chuan, vawiin ah hian kan rel hma lutuk lova. Ka hma chiah a sawi Siaha bialtu kha kan zingah chuan la awm se, khatiang khan a sawi ka ring lova. A awmna party a dang tawh avangin khatiang khan sawi mahse, a duh thovin ka hria a, sawi hmang khan.

Engpawh nise, he thil hi hnam thendarhna - hnam thenna a nih avangin FMR thiah hi sawrkarin duh lova official resolution a rawn tih hi, tih awm tak an ti a, a mimal tak pawhin ka thlawp thlap a; kan group lam pawh hian kan sawi hova, kan thlawp a ni. Tin, hei hi keimahniah te pawh ‘Private Member’s Resolution-ah te pawh ti ila’ tiin kan sawi hova; mahse, Government Resolution a lo luh tur thu te hriatna kan nei ru deuh a, chu chu chak zawk leh tha zawk turah te pawh kan ngai a. Hnam thil a ni a, party lampang ngaihtuah lovin; vawiinah hian Private Member’s Resolution ni lova official resolution-a a rawn lut hi a lawmawm hle a ni.

Tin, ‘Zoram leilung zau tak channa a ni’ tih an rawn sawi tliar-tliar tawh a, ka sawi nawn ve leh hrim hrim duh a. Khaw tam tak, keipawhin ka hriat leh a bul velah te pawh ka kal ve fona area khi a ni a. Kan balu lakna te, kan sangha manna te, lui dung hausakna tam tak Myanmar ramria kan khuate khian an eizawmna leh an ei bel te an chan dawn a, *legally* chuan chan lo mah ila, *practically*-in kan chan dawn tlat a ni. A chhan chu, luia sangha kan va man thin ang chite, khang ang zawng zawng kha a remchang dawn tawh lova, kan balu lakna tha tak tak te kha kan hmang theih tawh lo ang a, a leh lamin an hmang tangkai ang a. Khang kha chu kan thik lova, mahse, heti laia kan chan ve reng thin kan chang ta lo hi *economically* pawhin hlohna nasa tak a ni dawn a, ram zau tak channa a ni dawn a ni.

Kan BJP lam member zahawm tak, group leader kha, *Act East Policy* Prime Minister zahawm tak Pu Modi-a ten an rawn ti chhuak a, *Act East Policy* bawhchhiatna a ni dawn a ni, khilai khi kan hung tlat chuan. Tin, Asian countries ten thuthlung an lo neih mek te pawh hi a bawhchhe deuhin ka hria a, ka zir Chiang hman lutuk lova. Chuvang chuan, thenawm hro-hrang na deuh Chief Minister-in a nawr avanga he ramri hung mai tur hi Mizote tan a tha lova, kan hnam tan a tha lova, kan ram tan a tha lova, Act East Policy hlawhtlinna tur te pawh a dal theih ka ring a. Chu chu, hetia kan do tur hi a lawmawm hlein ka hria a ni.

Kan member zahawm tak Pu Lalrinsanga Ralte, Serlui Bialtu zahawm takin a rawn rawt ang deuh khan, a tawngkam erawh chu tlemin thlak hret ta ila, duap-aw deuh zul lo hian, ‘*ngen anni a*’ tih lampang lo khan, kan do thu hi kan resolution move-tu in a thiam zawk daih ang a, rawn siam rem te a rem em? Chu chu inthlahrung ang reng deuhin ka han rawt dek dek a ni. Tin, *biometric identification* kha chu hnam anga thil pawl tak anih avangin, he resolution-ah hian telh bawk ila, chutiang chuan kan thlawpna te pawh a chak leh zual deuh ang a, kan lawm leh zual dawn a ni.

Tin, he resolution hi umzuia, bawhzui ngei ngei ngai chi te pawh a nih hmel a. CAB chungchang te, UCC chungchang te he house-ah hian kan sawiho tawh thin a, a hun lai taka resolution siam chu a effective khawp mai a. Chuvang chuan, a hun taka official resolution-hi rawn lut ni te pawhin ka hria a; hei hi tih mawihnai hreta pass ka thlawp a. Tin, resolution hi kan pass tawh rau rau chuan, sawrkar pawhin um zui se la, kan Chief Minister chak tak khu lama connection nei tha tak pawh hian personal level-ah pawh thil thui tak a ti theiin ka ring a. He resolution hi han siam thata, *biometric identification* kan duh lohna ti telin ka thlawp e.

HON. SPEAKER : A lawmawm e. Thorang Bialtu MLA zahawm tak Pu R. Rohmingliana ilo sawm ang.

PU R. ROHMINGLIANA: Pu Speaker, ka lawm e.

Pu Speaker, he resolution hi ka thlawp tlat a, ka hmaa member zahawm takte sawi ang khan, he resolution-a “*ti lo turin ka ngen a ni*” tih hi keipawh ka lo point out ve a. Hei aia *word* chak deuh zawk “*ti miah suh se*” tih emawin a move-tuin thlak thei phei se chuan, a duhthusamawm leh zual ngawtin ka ring.

Pu Speaker, kan sawi leh duh chu - a move-tu khan a han thai lang zawk a. Ni 1.2.2024 khan MNF thuneitu sang *National Core Committee* leh *Political Affairs Committee* te khan resolution kan siam tawh a; Pu Speaker, i phalnain helai point hnihte hi ka han chhiar chhuak duh lawk a – “Border fencing chungchangah India leh Myanmar ramri hung tura India Sawrkarin hma a lak mek hi MNF chuan tha a ti lova, a dodal zel dawn a ni” tih kha point khatah a dah a. Tin, a point dang lehah chuan – “*Free Movement Regime* India leh Myanmar inrina km 16 ve ve zalen taka inkalpawh theihna hlih chungchanga India sawrkar hmalakna hi kan dodal tlat a ni” tih kha kan lo passed tawh a ni.

Pu Speaker, Tuichawng Bialtu MLA zahawm takin a sawi ang khan, keini pawh ka bial chhungah khuan he border fencing hi a awm a, hmanni ah pawh ka sawi lang tawh a. “Hei hian min tihbuai zia khaw; pakhat phei chu an hung chhuak a” tih kha ka sawi tawh a. A sawi ang khan, kawng chungchangah te harsatna kan tawk a, inkalpawhna - khua leh khua inkalpawhna chungchangah te, kan ram tha zawng zawng leilet hmun

thate kan thlai Mizoram-in kan lak luhna ang chite pawh hung chhuah vek a ni a. Tin, a duh tan chuan police ten misual um ta se, pawnah an tlan chhuak daih a, BSF-ten an lo dang leh si a; khatiang boruak te pawh kha thil awm thei a ni.

Chumi rual chuan, BSF-te awm reng chung khuan thil tha leh tha lo a lut ve thei tho mai a, a mak khawp mai. Hmanni ka biala ka kal pawhin zu bur pakhat ka hmu a, (khaw pakhat ah) India siam a lo ni lova, Bangladesh siam daih a lo ni a; gas bur te pawh India siam an hmang lova, Bangladesh a mi tho an lo la lut a, fencing anih avang khan ‘a lut lo ang’ tihna kha a awm chuang miah lova. Chuvang chuan, he fencing an kalpui tur hian kan ram eng emaw zat a lak hek dawn avangin kei chuan tha ka ti lo tawp mai a. Tichuan, 1948-ah khan border chungchangah Burma-in hma a rawn la tan a, helai kan inkalpawh theihna tur ang chi te pawh. Tichuan 2018-ah *Act East Policy* avangin India pawhin FMR pawh hi a rawn kal tan tir a ni a. Lo kal chho zelin, ti hian tun hunah tute emaw han sawi mai mai ang ni lo deuhin helaiah hian thil chiang deuh mai awm chu, “a thu mai; thil tak tak a la ni lo e” han tih laia kha han tarlan ve ka duh a chu a ni.

Ni 20th January khan Home Minister Pu Amit Shah khan “km 1643 Myanmar border hi hung thuai a ni ang” a tiha kha Assam Police Commando passing-out parade ah khan a sawi a ni. Chuvang chuan, hei hi thutling niin ka hria a. Vawiinah pawh hian he resolution hi kan pass ngei thain ka hria a, ka thlawp tlat a.

Amaherawhchu, Pu Speaker, ka sawi tawh ang khan, “*helai hi ti lo turin kan ngen a ni*” tih aiah hian, Pu Speaker, a move-tu hian phal se chuan, hei aia strong deuh zawk hian a rawn ti leh ka la duh fo a ni. Pu Speaker. Kha kha ka sawi theih ni se la. Ka lawm e.

HON. SPEAKER : A lawmawm e. Tunah Lawngtlai ‘W’ Bialtu zahawm tak Pu C. Ngunlianchung a ilo sawm ang.

PU C. NGUNLIANCHUNGA: Pu Speaker, sawina hun min pek avangin ka lawm e.

Vawiinah official resolution - kan ram chhanna tur kan han sawiho thei hi a lawmawm ka ti a, he resolution hi kei pawhin ka thlawp a. A bik takin hei hi ka ngaihtuah a - lo fencing tak tak ta se, keini sawlai *Lai*-ho nen phei chuan inkalpawh leh hnai taka khawsa hote kan ni a. Tuna FMR te pawh hi kan tangkaipui a, a bik takin Sangau, Pang Khua leh a chhak piah lam zel Mara Autonomous District Council area-ah te pawh in-bazar tawna khatiang in pawh tlang taka khawsa ho, cheng ho kan ni a.

Tin, kan hriat angin, khiliah khian kan unau-kan thisen zawmpui tak takte awmna a ni a. Heta kan hmuh ang hian, British sorkar khan *divide and rule policy* hmanga min thendarhna a ni a. Bangladesh lamah pawh khuan kan unaute tam tak an awm a, Zonhahthlak eng emaw zatin harsatna an tawk a, kum kal ta lamah te kan hmuh leh kan

hriat chu – “Zofate tan chuan Mizoram hi *Kan Jerusalem* a ni e” kan tih thin kha a takin kum 2-3 kal ta atang khan Zofate tan a nih zia a rawn lang a.

Myanmar sawrkar a buai a, helaiah mi tam tak an lo ral tlan a, vawiin niah pawh. Chutiang chuan Bangladesh-ah chi leh chi inkarah buaina a awm a, chungah pawh chuan kan unau zohnahthlakte, tunah pawh hian ka bial - Vathuampui, Tuithumhnar, Hmawngbu, Bungtlang South leh Hmunnuam leh hmun hrang hrangah sawn raltlan eng emaw zat, Chamdur project-ah te, Mautlang-ah te an awm a ni; chungte chuan harsatna nasa tak an tawh a. Chutiang chuan hei, (ka thenawm, ka bula thu, ka thianpa kha a chhuak ta daih a) ani khan ‘a engah mah hmaa lo tih’ a tih ngawt lai kha, ka hma chiah sawi Thorang bialtu zahawm tak khan a sawi chiang tawh a. Kan Home Minister te pawhin a order lehkha (black and white-in) hmu lo mah ila, he thil hi chu ‘a lo thleng dawn a ni’ tih an sawi chhuah tawh a nih avangin, kan lo invena, kan duhlohna kan lo lan tir kha kan tihmakmawh a ni a.

Ka hmaa mite pawhin an sawi ang khan, helaia ‘ti lo turin kan ngen’ tih laia hi, kan resolution neitu, khan kan hotupa khan han thlak deuh hlek sela, hei aia na (a ngen lam ni lo) in kan duh loh dan hi, zoram mipuite kan vai mai hian kan duh lo vek a ni. He border fencing hi tumah hian kan duhin ka ring lo. A political party ang zawnga hamthatna lo lakna chi emaw, lo tih chi pawh a ni lova, kan unaute nena kan inzawmna an sawi thin ‘ramin *ri* a nei a, thisen erawh chuan *ri* a nei lo; hnam pawhin a nei lo’ a ti a. Hei, a bikin MZP-ten nasa takin Zofest te an buatsaih thin a, ‘*Zofate inpumkhatna, inlungualna*’ an ti a. Helai a tawpnaa kan han tih dan te pawh hi a mawi ka ti a, “*Zofate min thendarh hi rorelna pakhat hnuaiia kan kun leh theihna turin hma min lakpui zawk rawh se*” han tih lai te hi a nghahhlelawm ka ti a. Zofate hmun khata, rorelna pakhata kan awmho tur hi keini phei chu ZORO lam kan ni deuh leh nghal a, a ZORO ang zawng pawhin a nghahhlelawm ka ti a.

Chuvang chuan, vawiinah hian he resolution hi lungual takin pass ila, Helaia thu pawh kha, hetah ‘document chu mi, kha mi’ tih sawi vak kha, kan hotute’n an sawi tawh a. Kan resolution neitupa - kan Home Minister zahawm tak pawhin hetah British hun atangin a rawn sawi tawh a, a lawmawm ka ti a. Chutih rual chuan, vawiinah hian he resolution hi lungual takin pass ila; helaia ‘ti lo turin kan ngen’ tih lai hi resolution neitu khan, kha aia na deuh hlek khan siamrem kha tha ti se chuan, ti tlang mai ila a va tha leh zual dawn em! Helai House-a kan pass mai ni lo hian, hmalam zelah pawh zofate kan tan tlana, hei hi chu ‘kan dodal tlat a, kan tan ho zel a ngai a ni’ tih lai kha Pu Speaker, ka han sawi duh a ni e. Ka lawm e.

HON. SPEAKER : Sawi leh turin Pu Lalnghinglova Hmar i lo sawm ang.

PU LALNGHINGLOVA HMAR, HON. MINISTER: Pu Speaker, ka lawm e.

Official Resolution tuna kan putlulh mek hi tawitea sawi ve ka duh a. Kan Home Minister-in a sawi tawh ang khan, *official*-in Sawrkar-laipui atangin thu dawn la awm lo mahse press report hrang hrangah a awm a; PIB pawhin a tarlang tawh nghe nghe a ni. The Hindu Chanchinbu February Ni 8-ah khan chiang takin a inziak a, chumi leh document dangte behchhanin FMR chungchanga ramri hung kaihhnawih hi tawitea han sawi ve ka duh a.

Hung tura tih hi km 1643 a ni a, chung zingah chuan India leh Myanmar-ina an intawm ramri hi Arunachal Pradesh-in a nei thui ber a, km 520, Mizoram hi pahnihna niin km 510, Manipur hian km 398, Nagaland hian km 215 a ni a. Nichina an sawi tawh ang khan 1968 - *Land Border Crossing Agreement* atang khan FMR km 40-a tan a ni a, 2004-ah khan km 16 a lo ni ta a. Tichuan, a ramri a him loh thu hi MHA - Annual Report-ah 2011-2012 khan an tarlang zawk a. Tichuan, Pu Speaker, 2013-2014 khan Moreh, Manipur-ah hian km 4.07 hung a lo ni tawh a, chu chu UPA sorkar lai a ni.

Tichuan, 2022-2023, hemi kum chhung hian MHA - Annual Report a a lan dan chuan, km 6.81 hi Manipur leh Myanmar inkarah hian ramri hung a lo ni leh ta a, chu chu NDA sorkar lai a ni a; km 3, kum kua chhungin an hung belh tihna a nih chu; a zavaia inhung tawh chu. Tichuan, tuna a lan danah chuan hybrid surveillance system hmangin Manipur lamah hian km 20 hung tura approved tawh a ni nghe nge a, tender chhuah tawh niin, km 1 hi crore 2.2 zela thawh tur anga siam a ni nghe nge a ni.

Engpawh nise, Pu Speaker, tun hi kan au chhuah hun a ni a, Mizoram-a rorelna in sang bera FMR thiah tur kan duh loh thu te, ramri hung tumna awm mek kan duh loh thu te auchhuahpui hun tak a ni. A thu ah hi chuan, engpawh nise, thu khauh taka dah leh dah loh hi a bawhzui dan chu a inang reng maithei a. Ka rilrua lo awm ta chu, political background inang lo tak takte pawhin ram leh hnam thuah chuan thukhat vuanin, kan duh a thuhmun a, kan inlungual thei hi a lawmawm ka ti a. Chuvangin, tuna official resolution lo lut hi ka thlawp e. Ka lawm e.

HON. SPEAKER : A tawpna atan leh he discussion conclude nan Dampa Bialtu zahawm tak Pu Lalrintluanga Sailo ilo sawm ang.

PU LALRINTLUANGA SAILO: Pu Speaker, ka lawm e. Kan hun a tawp tep a, ka sawi zo hman dawn lova. Chuvangin, hun min pek belh turah ka ngai a, Pu Speaker. (**Hon. Speaker:** Han sawi phawt mai teh. House-in rem a tih chuan aw.)

Aw le, Pu Speaker, vawiina official resolution kan sawiho mek hian ngaihtuahna mi ti kal thui hle a. Pu Speaker, i rem tihna in - Ni 16th August, 2018 ZPM press release No. B01/2018-ZPM/PR/60-a chhuah, Pu Lalduhoma, vawiina kan Chief Minister zahawm tak Myanmar a zin tuma a thusawi a tarlanah khan, MNF President Pu Zoramthanga leh

Mizoram Chief Minister Pu Lalthanhawla ten Myanmar an lo han tlawh tawh chungchangah Pu Lalduhoma chuan, “khawvel puma Zo-hnahthlak inpumkhatna ngaihtuah phalo hruaitu kan nei thin hi a pawitakzetin ka hria a. ZPM kan sawrkar chuan, khawvel puma Zo-hnahthlak enkawltu tur Minister *in-charge* kan siam ang”, a lo tih thu te min ngaihtuah chhuah tir a ni, Pu Speaker. Tun hunah hian hei, an lo sawrkar ta ngei mai a, khawvel puma Zo-hnahthlak te enkawltu tur Minister vawiin ni thlenga kan la nei lo hi chu a vanduai thlak hlein ka hria a. Vawiina kan official resolution te hi ‘chutiang minister chu lo nei ta ila, lo kengkawh ta sela’, tih te min ngaihtuah tir a. Amaherawh chu, Pu Speaker, khawvel puma Zo-hnahthlakte enkawltu tur Minister ZPM sawrkarin a la siam hma sia, India Sawrkarin free movement regime (FMR) tih tawp tuma hma a la ta hi.....

HON. SPEAKER : Khawngaihin, hei first session hi a tawp a, kan member hi a ding lak lawk khawp mai a, kan sawi zawh tir law law dawn em ni ang? (*House-in rem a ti a.*) Aw le, sawi zo law law rawh le.

PU LALRINTLUANGA SAILO: Pu Speaker ka lawm e. *Free Movement Regime* tih tawp tuma hma a la ta hi an demawm tak zet a. Myanmar nena ramri hrula chengte zalen taka kan inkalpawh theihna leh chutianga hun kan lo hmanna thin Central Sawrkarin border fencing tih a tum chungchanga a hmalakna tur thu kan han hria hi a lungchhiat thlak tak zet a, ‘a demawm tak zet a ni’ tih ka sawi duh a. Chutiang chuan, Pu Speaker, mimal taka he budget session kan neih lai ngei hian Private Member Resolution emaw, *Zero Hours* thlenga he *free movement regime* tih tawp tum duhlohna lan tira, he House zahawm tak atanga khawvel hriata au chhuah tuma, (keima mimal tak pawh ka inbuatsaih mek laia) hetiang a Sawrkarin official resolution a rawn siam ta hi lawmawm ka ti takzet a ni. Chuvang chuan, he resolution hi duh ang takin a thu hi strong lem lo mah sela, ‘thinlung takin ka thlawp tlat a ni’ tih ka sawi duh a.

Kan hriat angin, India Sawrkar hian *Dan leh Hrai* tha tak tak a siam thin a, kan ram kan Kristianna, kan Mizo culture tih dal theihna zawng leh, Mizo-fate insuihkhawm tumna kawngpui dal thei zawnga *Dan* min barh luh a tum fo thin hi, vawiin niah hian tih tak zet le inlungruala kan do a pawimawh takzet a. *Entirnan: Citizenship Amendment Bill* leh *Act* te, tin *Uniform Civil Code* te, *Biometric Enrolment* chungchangah te pawh kan Sawrkar hmasa khan huaisen takin a lo dodal tawh thin a. Kan hriat theuh angin, kha bill kha vawiin niah hian Central Sawrkar chuan min barh luih a la tum reng a ni tih kan hria a. Chutih mek lai chuan, biometric enrolment Central Sawrkar-ina ramdang atanga Mizoram-a rawn raltlante chhinchhiahna tur atana hmalak a tumna avanga State Sawrkar nasa taka min nawrna te, Myanmar leh Bangladesh atanga raltlan sahimna zawnga lo kalte humhimna kawngah Central Sawrkar-ina an rama nawr let tura State Sawrkar a lo hriattirna te, kan Chief Minister kal ta Pu Zoramthanga’n *nationalist* tak maiin leh huaisen taka a dodalna atanga vawiin thlenga tih puitlin loh a lo ni ta te hi a lawmawm a, hemi kawngah hian kan tanrual a pawimawhin ka hria a. Chutiang zel

chuan, kan NGO ten vawiin niah he FMR chungchangah hian an duhlohna te pawh kawng zawhin an lo auchhuahpui ta hial a ni a. Chutiang zawng zawng mipui duh dan te, kan mar dek chungah he Sawrkarin hma laa, official resolution atan, Central Sawrkarin Free Movement Regime (FMR) tih tawp a tum leh Myanmar nena kan inrina border fencing kalpui a tum hi tha kan ti lova, tilo turin kan ngen a ni.

“Diklo taka British sawrkarin *Divide and Rule Policy* hmanga Zofate min thendarh hi, rorelna pakhat hnuaia kan kun leh theihna turin hma min lakpui zawk rawh se” tih, kan Home Minister zahawmtakin a rawn put luha hi ‘thinlung takin ka thlawp a ni’ tih ka tarlang a ni e. Ka lawm e.

HON. SPEAKER : A lawmawm e. Tikhan Resolution chungchangah kan Opposition Leader leh kan House Leader ten sawi duh an neih chuan sawm tur an la ni dawn a. Amaherawh chu, hei kan chawhma hun a zo tawh a, kan chawl ang a, dar 2:00 PM ah kan sawi chhunzawm leh dawn ni a.

(*Recess*)

2:00 PM

HON. SPEAKER : Chawhma lam khan kan official resolution kan sawiho kha a ni a. Memberte kan duh dan pawh a inang tlang viauin a hriat a. Tunah kan Leader of Opposition-in sawi duh a neih chuan, kan sawm ang a. Sawi duh a neih loh chuan, ‘sawm ngei ngei tur’ tih pawh a ni chuang lova. Awle, sawi duh a neih chuan ilo sawm ang.

PU LALCHHANDAMA RALTE, OPP. LEADER: Pu Speaker, ka lawm e.

Vawiinah kan Home Minister zahawm tak Pu K. Sapdanga’n Official Resolution - “Central Sawrkarin *Free Movement Regime* tih tawp a tum leh Myanmar nena kan inrina border fencing kalpui a tum hi tha kan ti lova, ti lo turin kan ngen a ni. Diklo taka British Sawrkarin *Divide and Rule Policy* hmanga Zofate min then darh a tum hi rorelna pakhat hnuaiah kan kun leh theihna turin hma min lakpui zawk rawh se” tih a rawn pu lut hi lawmawm ka ti a, ‘ka thlawp a ni’ tih kha a hmasain ka sawi duh a ni.

Pu Speaker, vawiinah hian he resolution chhungah hian thil inhnaih deuh, hrang si pahnih a awm a. Pakhat chu - *border fencing* chungchang a ni a, pakhat chu - *free movement regime* chungchang a ni a, a inhnaih viau a. Amaherawhchu, thil hrang deuh a nih bawk si avangin, tawitein han sawi ve ka duh a.

Kan Home Ministerc - Resolution neituina a rawn sawi tak ang khan, he House-ah hian he border fencing chungchang pawh hi sawi leh, lo pass tawh thin a ni a. Tin, keimah

ngei pawhin kum 2007-ah he House zahawm takah hian “Border fencing hi Indo-Bangladesh chauh ni lovin, Indo-Mynmar border fencing pawh ti turin Central Sawrkarah nawr ni rawh se”, tih *Private Members Resolution* lo pulut tawhin, adopt tura lo sawi tawh tu ka ni a. Keia tan chuan, kan sawrkar resolution hian vawiin niah *golden chance* min pe ni hian ka hria a, ka lawm khawp mai a. A chhan chu, kum 2007 bawr, ‘*Indo-Mynmar border fencing neih ni rawh se*’ kan tih hun lai boruaka kan ram politics te, khawchhak lama kan unaute nen kan inkar boruakah chuan, a hun lai khan thil tihawm tak kha Sawrkar khan kan ti a. Party decision angin kha hunah khan Legislature Party-in a tih angin, member-te hmingin border fencing chungchang theh luh a ni a. Chutah chuan, resolution hming tumtu niin, *house record* vawiin ni thlengin a awm a, lam chhuah pawh kan ni.

Khatih hun lai khan khaw chhak lam kan unaute kha vawiina keini tuna boruak ang hi pha lovin Myanmar ‘Burma’ a nih lai a ni a. Sawrkar boruak tha lo avangin administration-ah mipuite kawng chi kimin an boruak a tha lova, Mizoram-ah an rawn chhuk thla a, crime tam tak commit-in harsatna tam tak an lo thlen a. Khatih laia kan crime record phei kha chu 65-70% bawr vela kha ‘khi lam atanga lo kal kan unaute atangin a ni em ni aw’ tih tur khawpin news reng rangah khan a lo kal a. Incident hrang hrang - naupang pawngsual te, tual thah te a awm avangin, Mizoram-a awm mipuite pawhin kha boruakah khan kan unaute hmel pawh kan hai a, kan inhnawtchhuak rum rum a, ‘*Mizo-II*’ tih te pawh a pian lai a ni a. Tin, pem tur reng reng pawh pem lehkha kan insist lai te a ni. Mizoram mipui pawhin Kan unaute mittui tlain kan siam a, kan buai nuaih nuaih a nih kha. Hnama kan la harh tak tak loh lai leh unau hmel pawh kan inhai lai boruak a nih avang khan, kha situation-ah khan kan NGO te pawhin khati hun lai pawh khan inkalpawhna mumal tak nei kha, “hetiang hi a hun lo e; ruihhlo tawlh te, ralthuam lo kal te leh thil tha lo tam tak hi khi lama atanga lo kal a ni” tih te a awm avangin, khatih lai khan Sawrkar khan Mizoram mipuite himna tur atan kha resolution kha party legislature-in tha a ti a, kan pu lut a ni. Kha kha a lo kal a, keimah ngei pawhin ka han bawhzui a. He House-a kan sawiho ni kha Ni16.3.2007 niin, he house-ah hian kan pulut a. Ni 20.3.2007 ah kan Assembly khan dan angin a concerned department - Home Department (Mizoram) ah a tul anga hma la turin theh thlak a ni.

He resolution hi (tukinah ka thiante’n an sawi tawh ang khan) tul kan tih avangin, kei leh ka thawhpuite pawh hian kan sawiho a, “Govt. Official Resolution hi a lo kal ang em aw? A lo kal loh chuan, Private Members Resolution-in i pulut leh teh ang” kan ti a. Kan party-in Ni 1.2.2024 khan ngaihdan fel tak a lo puan tawh bawk avangin, “kha kha i pu lut ang” kan ti a. Amaherawhchu, beng kan han dawh a, Sorkar lam atangin official resolution a lo kal dawn tih kan hria a, kan lawm a ni. Keima mimal ang pawhin kan Home Secretary te kan Home Department te pawh ka zuk bia a. Ni 20.3.2017-ah Assembly Secretariat-in lehkha a rawn thawn a, “Central Home Ministry-ah he lehkha hi in thawn thla em; engnge kan bawhzuina; Central Home Ministry atangin correspondence thil a awm em” tih te ka zuk zawt a. Kan Home Secretary pawhin kum 17 kal tawha mi anih avangin file hrang hrang an naute an han hai tir a. Amaherawhchu,

an hmu lo palh nge, kan hre lova. Assembly-a kan pass hnuah khan kan department leh central lamah pawh thui taka zuk umzui a awm lo. Hemi chungchangah correspondence pawh engmah a lo awm lova. Vawiin thleng hian central lam atang pawhin “In House pawhin a passed tawh kha; in duh vang alawm” min tihna tawngkam pawh kan la dawng ta chiah lova, a lawmawm khawp mai.

Chutiang chuan hun a lo kal chho zel a, *Hnam*-ah harh-tharna pawh kan lo chang a. *Hnam*-ah pawh unau kan nihna te, thlah-khat kan nihna te, *rorelna-pakhat* hnuai a awm duh, tihluhna a thendarh te kan ni. Tichuan, *rorelna-pakhat* hnuai a awm kan duhna pawh kha a ngaiin a lo piang thar chho leh a. Vawiin kan situation-ah phei chuan hetiang khawp hian harsatnaah kan intuam hlawm chho ta a, unau kan nihna te kan han hmu chho leh thei ta hi, i veilama thute pawhin ‘kan duhtusama kha a lo thleng chho mek a ni’ tih kan sawi duh a. Chumi avang chuan keimah ngei tan pawh hian ‘golden chance a ni’ ka tihna chhan chu. Kha resolution he House-a lo move tawh tu khan, tun hun atana border fencing kan duh loh thu sawi ve theihna forum tha tak mai kan nei leh thei ta hlauh hi, lawmawm ka ti a. Kan ram, kan hnam kal zel tura tana resolution pawimawh tak mai vawiinniah a hunin a rawn keng a, a lo thleng chho ta hi lawmawm ka ti a ni.

A dawt lehah kan sawi leh duh chu hnam issue bikah hi chuanin hun kal tawhah pawh lungrual takin i ding leh veia thute hi kan awm thin a, lawmawm ka ti a. Vawiinah pawh kan Sorkar in hnam issue a rawn la a. Tihian lungrual takin kan han kal a, kan han awm kha lawmawm ka ti a. Sawrkar hmasaah khan *Uniform Civil Code* chungchang te leh *Citizenship Amendment Bill* chungchang te pawh official resolution kan Home Minister-in a putlul pawhin, i veilam pawhin lungrual takin a lo thlawp tawh thin a, he House timawitu leh tizahawmtu a ni thin a ni.

Ka hriat renga chu *Delimitation Commission*-ina kan constituency te rin danglam tuma, kan hnam tan him lo tura a lo lan lai hun 2002-2003 chho ah te pawh khan, kan Chief Minister Pu Zoramthanga ho ngei khan Aizawl khawpui chhungah kawng kan zawh luih luih mai a ni. ‘party-party’ tih awm lovin, kan sawrkara Chief Minister, Minister leh MLA te’n kawng kan zawh a ni, hnam tan chuan. Vawiinniah pawh hian ka han sawi duh chu - kan NGOCC te pawhin hemi border fencing leh FMR chungchangah resolution te an lo nei tawh a, he House hian kan neih chhonzawm dawn bawk a. Mizomipui aiawh zawng zawngte’n lungrualna kan neihah hi chuan, eng thil pawh lo kal chhonzawm dawn se, party angin tumahin hamthatna kan zawng dawn lo. Hnam anga kan dinchhuahna tur, sakhua anga kan din chhuahna turah hi chuan ‘*We Are One*’ kan tih chhonzawm zel hi a tul ka ti a. A tul a nih chuan, Sawrkara kan Chief Minister ho pawhin kawng kan zawh ang a, a tul a nih chuan engkim kan ti tur a ni. He ram, he hnam himna tur atan chuan tumahin political advantage lak emaw, kan thian tute emaw pawh eng emaw zawnga han sawi mawi loh tum te hi a tha lovin ka hria a. Chuvang chuan, vawiinniah he issue lo kal tur ah pawh hian, i veilama thute pawhin kan sawrkara

hian na taka FMR leh border fencing-ah Mizo hnam duhdan anga an kal phawt chuan, kan thlawp zel dawn a ni.

Union Home Minister-in na takin hma a la a ni; Ni 20.1.2024 ah statement mumal tak a siam chu Prime Minister pawhin a pawmpui tawh thu a sawi tawh avangin, order mumal la thleng lo mahse, kaltlangpui an tum hle tih kan hmu a, Mizo mipui zawng zawng, political party zawng zawng, NGO zawng zawngin ‘kan duh lo tak zet a ni’ tih hi street-ah pawh lan tir a la hun dawnin ka hria a. Chutiang tur chuan kan rilru hi he hnam thilah hi chuanin kan tan ho hi a pawimawh. Eng emaw nikhuaah chuan politics ah *ideology* hrang kan neih avangin han inbeih chang pawh kan nei ang; thu inchuh chang pawh kan nei ang. Hnam thil bikah na na na hi chuan kan tangrual tur a ni; i ding leh veite hi he ram tana thawk kan nih avangin

A dawt lehah chuan, FMR chungchanga highlight ve ka duha chu - Pu Speaker, Mizoram bikah km 510 hung tur chungchangah pawh kan Sawrkar kal ta MNF Ministry ah pawh khan, Home Ministry lam atang pawhin tum tam tak border fencing hi bul tan an rawn duh thu an rawn sawi a. Kan hotu - kan Chief Minister te, kan Home Minister te pawh kha an rawn sawipui a, tih an tum thin a ni. Mahse, kan Ministry kal ta khan border fencing hi a takin na takin kan lo do tawh a. Chutiang chuan vawi tam tak kan lo turn-down sak tawh thin a, kan hotu ten an lo phal lo nasa tawh thin a ni. Tun hunah pawh hian rawn tih tum eng ang mahse, a sawrkar ber hian kan duh loh chuan, ban pawh phun rawh se; kan vaw chhe zel tur a ni. Chutiang tur chuan he rorelna khawl atang hian mipuite pawh hian ‘pakhat kan ni’ tih hi kan lantir a tulin ka hria. India chakna hian eng ang pawhin tum mahse, Mizo hnam leh sakhua a him lohna tur a ni emaw, kan inunauna tih chhiat a nih dawn emaw chuan, ‘kan su ngam dawn a ni’ tih hi kan rilruah awm se ka duh a.

Tin, chu lo lehah chuan, *biometric enrolment* chungchang pawh kha kan unau politically-a harsatna an neih avanga rawn tlante chhinchhiahna hran neih a tum pawh khan, Ministry kal liam taa Cabinet khan, Home Ministry-in ti tura min rawn tih pawh khan kan duh loh thu kan resolved a, ‘kan ti thei lo’ kan ti a ni. Kan unaute *identification* hrang pek tur pawh hi kan dodal hmak mai a ni. Hetiang thilah hi chuan he Sawrkar hi in khawng dawn niin ka hria a. Amaherawhchu, (kan thiante sawi ang khan) a thu hi hei aia han tih khawng deuh rawtna te kha a awm a; kha kha chu a resolution neituin rawn sawi sela. Hetiang pawh hian kan pass-pui thei a, ‘a aia khawng zawka in tih pawhin kan kal thui thei viau ang’ tih kha ka sawi duh a ni.

Eng le, khaw le, he thil lo kal hi Mizo hnam tan a tha lo; Mizo hnam lo piang chho leh ‘*rorelna pakhatah engtik ni ah emaw chuan kan la awm ngei ang*’ tih beiseina nen, min tih chhiat tumna boruak tha vung chho mek a nih avangin, he thil hi Mizo tan hian a tha thlawt lo a ni. Chuvang chuan, FMR leh border fencing chungchangah hi chuan inlungual ila; hun kal tawha kan lo passed tawh te he House ngeiin an thiat a,

vawiinniah lungrual taka kan kalpui tur leh, kan House *record* ah pawh awm tura vawiinniah ‘he House hi a lungrual a ni’ tih hmuhtheih tura a awm hi a ropui ka ti a ni. Chuvang chuan, Pu Speaker, he resolution zahawm tak, kan Home Minister-in a rawn put luh hi ka rawn thlawp a ni e. Ka lawm e.

HON. SPEAKER : A lawmawm e. Tunah chuan, kan House leader zahawm tak Pu Lalduhoma, sawi duh a neih te sawi turin ilo sawm ang u.

PU LALDUHOMA, HON. CHIEF MINISTER: Pu Speaker, ka lawm e.

A hmasain, kan Home Minister chungah lawmthu ka sawi a, he official resolution a rawn move-naa a thusawi kha kan proceedings-ah kumkhuaa awm tur a ni a. Kha kha, kan hnam tan *document* pawimawh, nakin zelah pawh kan tlawhchhan tura tan a tlingin ka hria a. Member-te tan pawh sawi nawn leh ngai tawh lovin, *a chepa-kai* atangin min rawn hrilh a, a lawmawm ka ti hle a ni.

Myanmar nena kan inkarah hian, khawvel awm tirha ta kan hriat theih chinah, englai mahin *inkalpawh* hi khap a la ni ngai lova. *Treaty of Yandabo*, 1826-a British sawrkar leh Burma lal te’n an lo signed ah pawh khan, a hma atanga lo inkalpawh reng kan nih avangin, he kan inkalpawhna hi awm zel tura ngaih a ni a, khapna engmah a awm lo a ni. Tichuan, 1948 kuma Burma a lo *independent* pawh khan, he *Free Movement* hi a awm zel theihna turin an sawrkarin a recognized a, an passport rules ah pawh an ziak lut thlap a ni. Chutiang bawkin India a independent hlim 1950 ah kan passport rules ah te pawh he *free movement* hi lo tarlangin official notification hial an lo chhuah a. Chuvang chuan, he ram pahniha mihring thisen inzawmte kan inkalpawh theihna hi ‘thiah a ni ang’ tih tunhma roreltute pawh khan an lo ngaihtuah ngai lo. British hnuai atangin India a independent a, Burma a independent a, thiah tumna lam hawi hi a awm ngai lo reng reng a, a nemnghehna lam hliir hi kan hmuh a ni. Amaherawh chu, chumi kal zelah khan a guideline han siamthat ngai lai te, a huap chin tur km han siam that ngai neuh neuh chu khawih a ni thin a. Kum 1968 ah te khan ‘km 40 chin’ tih kha a ni a, 2010 ah ‘km 16 chin’ tih te a ni leh a, a paih lampang hi chu a ni ngai lo hrim hrim a.

Tin, India Sawrkarin policy thar a nei a, South East Asia te nen hian social contact te, economic thilah te leh sumdawwna kawng engkimah ‘inpawh lehzuala kan kal hi a-tu ve ve tan pawh a tha ang’ tih rinna neiin *Look East Policy*, 1990 chho ah khan siam a ni a. Khatih lai khan Mizoram Legislative Assembly - Public Accounts Committee ah Chairman ka nih lai a ni a, ‘a hmunah i han zirchiang teh ang’ kan ti a. Tichuan, Prime Minister Office ah phalna kan dil a, phalna kan hmuh angin MLA eng emaw zat te nen khaw chhak lam ram kan han fang a. Vanneihthlak takin kan kalna lama an High Commissioner leh Ambassador te kha ka batch-mate te an lo ni deuh vek mai leh nghal a, hlim takin min lo dawngsawng a. Tichuan, an sumdawwna hmunpui te kan en a, a video te kan rawn hawn a, kan phur em em a. Sumdawwna kha tan mai turah kan

inngai a ni. Amaherawhchu, khatih laia PMO khan Burma kan tlawh kha min phalsak thei tlat lova, chumi tih loh chu a dang chu kan tlawh deuh vek a. Tichuan, kan lo hawnah kan lawng chawlhna neihchhun Hruitezawl pawh hah pawh, sawi thei lovin a tuk tuk leh maiah kan va tlawh leh zui a ni. Chutiang chuan kan lo phur em em a, saw laiah sawn multipurpose kawngpui te a lo chhuak dawn a, lawng chawlhna te thlengin, chu chuan “sumdawnna khawvela kan nunphung rawn tidanglamin kan social life te pawh a nghawng dawn e; i lo inzir lawk teh ang” te pawh kan ti a inpuahchah a ngai a ni kan ti a. Tichuan, 2014 ah pheih kha chuanin *Look East* mai nilo, ‘*Act East*’ tih hialin a lo awm ta a. Tichuan, kan inkalpawhna tur kawngpuite pawh hmun eng emaw zatah ruahman a ni a. Tin, *Land custom station* te pawh buatsaih a lo ni chho zel a, a inhnaih zawng zelin kan kal a ni. Tin, 2018 ah *bilateral agreement* te pawh signed a lo ni chho ta hial a. Heti taka India Sawrkarin a ngaih-pawimawhna chhan hi chu South East Asia nena kan inkalpawhna *corridor* awmchhun a nih avang hian, kan thatpui hle dawn nia ngaih vang a ni a.

Chutiang chu a nih ngar ngar avangin, tunhnaiah hian kan *Look East* leh *Act East* bakah a hmalama thil lo kal tawh zawng zawngte kalh zawngin kan *Free Movement* paih tumna leh fencing te pawh tih tumna ri kan hre ta a, kan thla a bar ta a. A chhan ni bera kan han puh chu, Manipur Chief Minister in a demand a, ‘ani hi a tlatlum deuh a, kan hneh lo deuh a ni lo maw’ han tih te a ni a, eng emaw chen pawh a dik ang. Amaherawh chu, pakhtah chuan, keimahni zir loh hi a ni bawk a. Dik tak chuan (sawi a hrehawm na a) kan Sawrkar hmasa te koh chhuah a ni ve tlat a ni.

Private Resolution pahnih ngawt border fencing ti tur hian an lo passed tawh a, *Private Resolution* chu Pu Speaker, kan hria a, Opposition Private Resolution hi a tlang ngai meuh lova; Opposition Private Resolution pawh hi Opposition Legislature Party in an ngaihtuah phawt a, an thehlut thin a. ‘Private Resolution’ tih a ni nain, a thehluttu mimal ngaihdan a ni ngai lova, a awmna party ngaihdan a ni zel a ni. Ruling Party a tang ngata Private Resolution lo lut te pheih hi chu *Ruling Party official Resolution* tluk a ni; a danglamna a awm tak tak lo. Chuvang chuan, kan ngaihthlak tawh ang khan, kum 2001 ah MNF-MLA pakhat in kan *International Boundary* hung rawtna resolution, Ruling Party atangin a lo lut a, an passed tawh a. India hian hei hi a theihngihl mai mai hauhin ka ring lo, kan mitmei an hmu a ni. Chu chu duhtawk lovin, 2007 ah vawiina kan Opposition Leader ngei hian a rawn pulut leh a, an passed leh kha a ni a. Chutah chuan, kha Resolution khan engnge a tum? “*Bangladesh nena kan inkar ramri chauh hung lovin, Myanmar nena kan inkar ramri pawh hi hung ni ve rawh se; India Sorkar hian min phalsak rawh se*” tih chu kan resolution, kha khami ni khan a ni.

Tin, khatih laia kan Chief Minister-in he House ngeia a sawi chu - “Delhi ka kal apiangin Prime Minister leh Home Minister hnenah, Bangladesh inkar chauh hung hi a tawk lo; Burma nena kan inkar hi hung ni ve rawh se” tiin ka ngen ziah a, ka la sawi ziah a ni. Vawiinah he Resolution hi min pass-pui theih chuan, Delhi-a ka lo zuk sawi

thin hi arawn tichak ang a, Central Sawrkar pawhin min hung sak phah duhin ka ring” ti hialin a sawi a ni kha. Chuvang chuan, an zuk ngen tlat a, kan Chief Minister hovin, Ruling Party in vawihnih ngawt Burma nena kan inkar ramri hung hi a ngenin an zuk ngen a, *vawihnih*, he House zahawm takah hian Resolution hi an lo passed tawh a, ‘chumi kal zel chu kan tuar’ kan ti lo thei lo, dik chiah chuan.

Tichuan, khami ni khan nasa takin kan inhnial a ni. Kei pawhin khami nia thu ka sawi khan, kan Chief Minister ngei pawh, “hmanni lawkah ZORO Assembly-ah *Hnam-inpumkhatna* zawngin i sawi a, vawiinah ramri hung i sawi leh a, i thusawi pawh hi a inkal h a ni. Chuvang chuan, heng ramri barhluih - *Divide and Rule Policy* hmanga an siam hi keini chuan kan pawm ve ngai dawn lova; heta kan hung chuan, ‘*kan pawm; kan recognized dawn*’ tihna a, thangthar te’n min la thiam lovang. Chuvangin, hei hi withdraw leh rawh u. In ti lui dawn a nih, chuan keini chuan he *Hnam-pawikhawihna* ah hi chuan kan kut kan sil ang; kan chhuak ang” ka ti a, kan walk-out hial a ni, he House a tang hian.

Pu Speaker, eng emaw chen Parliament leh Legislature ah hian hun kan lo hmang ta a, ka hun hman tawh zawng zawngah walk-out ngai khawpa thil ka tawn vawikhatna a ni. Chuvang chuan, a pawl kan ti a. “India Sawrkarin hetia in tih chuan, arawn hung dawn a ni; in ngen tlat a; kan passed leh ngat phei chuan kan che thei tawh lo ang” kan ti mawlh mawlh a ni, khami ni pawh khan. Tichuan, kan Congress unaute pawhin theih tawpin an oppose a, amaherawhchu an ‘passed’ lui a ni. A pawl hle a ni.

Amaherawhchu, hei, vawiin-ah kha resolution puluttute nen ngei ramri hung duh loh thu kan han sawi tlang a, kan han lungrual ta hi chu, a lawmawm chu ka ti khawp mai. Hnamah kan Chiangthar ta ni ah ka pawm a. Hnama Chiang bera in sawite hi, an lo Chiang chiah lo thin emaw ni, Pu Speaker. Term hmasa-ah pawh khan ka zawhnaah, “Mizoram chin hi engnge”, ka ti a; kan Home Minister-in min chhan danah chuan, “Mizoram chin hi kan la hre lo; kan zirchiang mek a ni” a ti a ni. Independent kan move lai zawng zawng te pawh khan *kan ram chin kan lo hre lo* a lo ni a! Kan harh tlai thin ang reng a. Hei vawiin-ah kan inlungrual a, a lawmawm a. Mahse “pawnlamah hian an pute hian an lungrual pui ang em aw?” tih pawh hi ngaihtuah ve theih tak mai a ni a; hlauhthawna hi chu a la awm deuh hlek a ni. Engpawh ni se, vawiinah chuan kan ngaihdan te kan thlak a, *Hnam chungchangah* ke kan pen tlang thei dawn ta nia a lan a vang hian, lawmawm ka ti hle a ni.

Tin, Biometric Identification chungchang kan sawi a. Home Ministry in ti turin arawn hrilh a ni, Sawrkar hmasa kha. Kan Sawrkar hmasa khan biometric identification hi Myanmar atanga kan refugee-unaute chungchang ah tih turin a lo pawm fel hmak tawh a, hma pawh an la a ni. A finfiahna pawh kan nei a ni. Amaherawhchu, inthlan dawn tepah khan, “he hna hi chu lo chawhlsan rih rawh u” tih an ni a, an chawhlsan a. Tichuan, keiniin sawrkarna kan han la chho a, “chhunzawm tawh suh u” kan ti ta a ni; vawiinah

hian kan tih tawp tir a ni. Prime Minister pawh ka hrilh a, Home Minister pawh ka hrilh, “Hei hi kan chhonzawm thei lo; a portal in hman hrim hrima hi *criminal portal* in hmang a; illegal-immigrant deport turte an ngaihtuahna *portal* chu in hmang a; *criminal* an ni lova, *illegal-immigrant* an ni bawk lo. An duh avanga lo kal an ni bawk lova, an cheng ngam tawh lova, min rawn bel turin an rawn tlan a; *refugee* an ni. India hian a protocol ah hming sign ve lo mah ila, official in, ‘refugee’ ti thei lo mah ila, practical in *refugee* an ni a; *criminal* an ni lova, *illegal immigrant* an ni bawk lova. Chuvang chuan, a portal hman tura min pek hrim hrim hi kan hmang thei lo”, tiin tawngkam pawhin ka hrilh a, ziaak pawhin kan thehlut a ni.

Tin, chu mai ni lovin, hetah lehkhah te an lo zir ve a, “kum tawp an exam certificate ah ‘*Myanmar refugee*’ tia chhinchhiahna in lo siam tur a ni” a ti bawk a ni, Sawrkar hmasa kha. Chu chu keini chuan ‘kan siam lo ang’ kan ti, a chhan chu, India ram hmun hrang hranga educational certificate kan en a, chutiang kan hre ngai lova; kha kha lo chuan tir ngawt turin State Sorkar hian thuneihna kan neih pawh kan ring lova. UGC atanga order lo kal te a nih loh chuan, kan tih chi ah pawh kan ngai lova, hei hi kan pawm thei lova. Amaherawhchu, hemi rual a kan rawt chu, Sawrkar hmasa hunah khan thil tha tak mai, *Household Registration Bill, 2019* kha lungrual takin kan passed a ni. Khaw tin hian registration nei vek sela, a khaw chhunga mite

PU LALCHHANDAMA RALTE, OPP. LEADER: Pu Speaker, kan House Leader khan Myanmar atanga lo kalte education ah an *nationality ziah* chungchang a sawi kha, ‘hriat sual palh a awm ang em aw’ ka ti a. Khatih hunlaia Education Minister kha ka ni a, an pawl an sawina zat zat hmunah kan kal tir vek a, engkimah inthliarna ‘*Myanmar mi an ni*’ tia tihlanna khawiah mah kan demand lo; khawi hmunah pawh admission ti turin instruction kan pe zawk a ni. Khatianga an *nationality ziahna* tur kha, ka hriat chinah chuan keini chuan kan nei lo a ni.

PU LALDUHOMA, HON. CHIEF MINISTER: Pu Speaker, chu chu a dik alawm. Biometric Identification ti tur khan ‘sawrkar hmasa khan hma a la’ ka ti a, education certificate ah chuan ‘hma a la’ tih ka sawi lo a ni. Chuvang chuan, vawiinah pawh hmalak kan tum lova. Tin keini lo tih theihah pawh kan ngai chiah lova, hei hi chu kan ti lo ve tawp mai a ni. Chu chu a ni a.

Tin, *Household Registration Bill* chu lungrual takin hetah kan passed a. Mizote hi pipute atanga inchhinchhiah thin hnam kan ni a, kan Lalte lal lai atang tawhin *Khawchhiar* nei thin hnam kan ni a, inchhinchhiah thlap thin a ni. Chu chu kan lo nei lo ta a, hetah chhim lama population te *abnormal growth* in a kal reng a, rawn lut ru an awm reng a. Tuna refugee te hi chu *temporary* thil a ni mai zawk a, eng lai pawhin kan ramah hian rawn lut ru an awm reng a, kan manganpui a ni. Bangladesh atang tein, West Bengal-in a lo dang seng lova, Assam in a lo dang seng lova; Mizoram an rawn lut a, kan hre vek a ni. Chumi chu kan lo tih tawp theina ber tur chu - khaw tin hi inchhinchhiah ila, register

nei ila, pem dawnin *pem-lehkha* la thlap ila, *pem-lehkha* tel lo chuan khawi khua mahin lo dawngsawng lo sela. Kohhrana *pem-lehkha* kan la ang chiah hian, “hei hi kan neih chuan, kan him ang” tiin Sawrkar hmasa khan ngaihtuahna tha tak a lo seng a, chu chu kan passed a ni.

Amaherawh chu, India President pawmpuina - *assent* a ngai a, India Sawrkara President khan a pawm thei tlat lo mai a lo ni a, term hmasaah pawh khan. ‘Kha kha, engnge kan thlen tak?’ tiin kan inzawt zeuh zeuh thin a, chhanna mumal kan dawng thin lova. Hmanni Delhi-a kan zuk kal khan Home Minister leh Prime Minister ka sawipui a; tichuan, Home Secretary te nena bawhzui turin min ti a; tichuan, Home Secretary nen kan han sawi dun leh a, ‘withdraw mai rawh u, in bill kha; a thar rawn thehltut mai rawh u. A chhan chu, kan pawm theilo a ni. Kan pawm theih loh thil -in thuneihnain a phak loh thil in dah nual mai a; withdraw leh mai rawh”, min ti a. Tichuan, keiin “withdraw ringawt mah ila, khawi lai hi nge siamthat ngai lai; khawi lai hi nge induhloh lai kan hriat chuan si loh chuan, rawn thehltut leh mah ila, in duh ang a nih leh si loh chuan, min lo pawmloh sak leh emaw kha a ni ang a, a buaithlak dawn a. Chuvangin, in *object* lai, a point te tea ziakin min rawn hrilh ta che” ka ti a. “Aw le”, a ti a. Amaherawh chu, min rawn hrilh lawk loh avangin, hman ni khan Home Secretary hnenah chuan reminder kan thawn leh a, ‘hemi chungchangah hian khawi laite hi nge inngaihmayh?’ ka ti a. Chu chu min rawn pek hunah, heta kan passed tawh hnu mah ni se, a danglam dawn avangin, Session leh remchangah a bill kha kan rawn put luh leh te pawh a ngaih hmel khawpin ka hria a. Chu chu kan duh ang tawka thain kan ti thei dawn nge chu a hriat loh a, kan la pass tlang leh turah ngai ila.

Tin, Zofate khawvel hmun hrang hrangah kan lo indaidarh ve ta a, ‘a changtu bik department te pawh siam chhoh te pawh a tha awm mang e’, kan ti thin a. Amaherawh chu, chutiang em ema han buaipui tham kan la awm lova. Vawinah hian department tin leh minister tin tena an chan loh ang chi reng reng hi chu CMO Office chan a ni nghal mai a; GAD perview a ni vek a. *Mizo-Diaspora* hi kan theih ang angin kan buaipui reng a. A hranpaa enkawltu minister hran em em va siam ngai lovin, CMO atang hian kan *Mizo-Diaspora* te interest leh an harsatna te hi chu kan take-care mek reng a. Tin, nimin piah lawkah pawh kan nurse-te German leh UK-a an kal theih dan tur te ngaihtuahin meeting kan nei a. Tin, tunah hian Taiwan-ah thalai eng emawzat an kal theih dan tur te kan ngaihtuah mek bawk a; mi ina awm tur ringawt kan thawnchhuak hi a thain kan hre lo a ni. Taiwan hian mi 1,00,000 an mamawh a, Vaiho ai chuan min duh zawk bawk si a. Chung te pawh chu, tunah hian Ambassador a lo kal dawn a, sawi zui kan tum a ni. Chutiang chuan, kan Mizote hmun hrang hranga awm hi a theih angin kan buaipui a, placement-pek chungchang leh a thawnchhuah buaipuitute nena an inkar buai pawh hi chinfel vat kan tum a ni.

Tichuan, a tawpa kan sawi duh chu, Pu Speaker, keini chu kan Party leh kan Sawrkar hi kan dinna a la ngai reng a. *Chin-Lushai Conference, 1892*-a a lo awm khan, Vai-hote

nen pawh awmtlang chiah min ngai lo a ni, British Sawrkar khan; Kawl-hote nena dan pakhat hnuaiia awm tlang chiah min ngai lova; “*hnam hrang; culture hrang nei; inawp dan hrang nei; legal system pawh a hranga nei kan ni*” tih kha min recognized a ni. Khang ho zawng zawng kha ‘rorelna pakhat hnuaiia i dah teh ang’ tiin Fort William, Calcutta-ah khan thuthlukna kha an lo siam a; kha kha han hlawhtling se chuan, vawiinah hian heng hi sawi sawi ngai tawh lo tur a ni a. Amaherawh chu, communication te a la chhiat em avangin, an implement thei ta lova, tichuan, then darhin kan awm ta nuaih mai hi pawl kan ti a. *Chin-Lushai Conference* Ni hi kan unau ZORO ten a cham a lo thlen hian an hmang ziah thin a, kei pawhin vawi eng emaw zat ka hmanpui tawh a. Kha tih laia kan hnam chungchanga thil lo kal sual kha, vawin thlengin kan tuar ta a ni.

Tichuan, India a lo zalen khan, India rama an *dan* hman lai ang ang hnuaiia awm ve chi ah min ngaih loh avangin, kan hranna kha min recognized sak a, *6th Schedule* min pe a; *Autonomous Council* min pe leh a; hman nia ka sawi tawh ang khan, *6th Schedule* hi a *autonomous* em em a, Constituent Assembly ah khan thuneiha a sang lutuk - ‘*Constitution, within Constitution* a ni ringawt alawm’ tia nasa taka sawisel a hlawh a. Amah erawh chu, Nehru te, Ambedkar te zarah hei hi kan han nei hram a; tichuan, inawpna hran neiin kan la kal thei zel a ni.

Tichuan, UT kan han nih hnuah khan kan *6th Schedule* kan han paih hlauh mai a, *District Council* kan han paih hlauh mai hi a pawl takzet a; Meghalaya te chuan an la chhawm vek a ni. Tunah hian, District Council pathum kan la nei a, (a nihna takah chuan) a bak zawng hi chu *Tribal Area* pawh kan ni tawh lo; tin, income tax pawh hi awl tawhlo tur deuh kan ni. Amaherawh chu, *tribal* kan la nih miao avangin, *Schedule Tribe Order, 1950* ah kan la chuang a, eng emaw ti tiin kan la him a ni a; kan kal zelna tur hi sawi a har viau mai. ‘*6th Schedule* hi kan ramah hian *reintroduce* leh vek mai tur em maw ni le, kan hnam hi a him zawk nan’.. tih te pawh hi ngaihtuah theih tak a ni.

Tichuan, hei, *barhluih-ramri* pawmpuina hi a nih theih dawn avangin, he thil hi kan duhlo tak zet zet a. Tunlai Burma ram dinhmun kan thlir chuan, engtia rei nge Burma sorkar khian a daih dawn kan hre lova. Hmanni lawkah phei kha chuan an camp pakhat an chhuahsan a, silai tha deuh deuh mai 1000 chuang an chhuahsan a, an tlanchhiatsan a ni. Silai-mu pawh kha a lo tam em em mai a, Arakan Army khan a la ta vek nghe nghe a ni. Tin, hetia sawrkarna kan han chan hnu hian, Burma sipai 600 chuang hi thlawhnain kan thawn chho tawh a ni. Tiang chu a ni a; kil tinah an hualbet tan tawh a, nakinah ‘khi Sipai-sawrkar khi lo tlu ta sela, engtingge a awm dawn’ tih tumahin kan sawi thei lova. Amaherawh chu, chung hun thlir rana, “*Hnam-inpumkhatna kawng Khuanu hian min sialsak dawn a ni awm mang e*” tih rilru pu chung a, he thil lo thleng tur, he boruak inlumlet tur hi kan lo hmachhawn a ngai tak meuh meuh a, kan inkar daidanna siam zawnga kan chet hi a hunlo takzet a ni.

Hmanniah Khan Delhi-ah Railway Minister nen Map kan en dun a, a residence ah, Burma ram kal zel dan tur han ngaihtuah hian, “sea-port te pawh hi kan neih ve theih mai dan a awm dawn hi maw le” tih te thlengin kan sawi a; hemi chungchangah hian India-sawrkar pawh hian policy pui tak mai, ‘*Akhand Bharat*’ tih chu a nei a ni. Chuvang chuan, India Sorkar pawhin chutiang policy a neih lai leh, helaia kan unaute nen *rorelna-pakhat* hnuai a awm mai theihna chance te pawh nei mai thei dinhmuna kan din laia, kan rilru tina zawng leh a indaidan zawnga hma lak hi a hun lo kan ti takzet a, chu chu India Sawrkar hotute pawh ziak leh hmaichhanah kan sawipui bawk a ni. Anni pawhin na takin min dodal lem lo.

Pu Speaker, vawiinah hian insawi-thlamuan chu tha ka ti hauh lova, amaherawhchu, Central Sawrkar nena kan indawrna chinah hi chuan, chuti lutuka lo enghel loh te pawh hi a pawl lo mai awm ma nge aw; ‘min barh luih hi an tum lutuk lo mai awm mang e’ tihna rilru te pawh keimahah chuan a awm a ni.

Tin, 2007 - *UN Resolution on the Right of Indigenous People* kha kan en chuan, “Indigenous people te reng reng, sawrkar hranga an lo awm a nih pawhin an inkalpawh thei tur a ni; sakhaw chungchangah te, social chungchangah te, political thlengin khangah khan ramri hian a dai dan tur a ni lova, zalen takin an inkalpawh thei tur a ni” tih te kha a chuang a. Fencing siam hi India sawrkar tana sum sen tur pawh a hautak lutuk dawn a, a sum sen tur zatve pawh hian border area hi min develop sak se a tha a. China border bik atan hian development scheme Prime Minister-in a siam a, chu chu, “Mizoram tan min hman tir ve rawh” tiin kan dil nghe nghe a ni.

Tin, Bangladesh border fencing kan sawi a, hei hi Congress sawrkar lai khan Boundary Commission ah min sawm angin ka tel ve a; helicopter nen a hmunah kan va enchhuak vek tawh a ni. A taka hmutu ka ni. Dik chiah chuan, saw boundary fencing saw lui lai taka atanga teha metre 500-a hlaah a siam tur a ni a. Kha pal hrulah khan motor a kal thei tur a ni a, BSF ho kha englai pawhin an duty-in, an kaltlang thei reng tur a ni a. Kawng sial thar a ngai a, kawng lo awmsa an zawh ta mai mai a, sum save nan; khatih lai kha MNF sawrkar lai a ni a, an ngaihsak lo reng reng a, an duh duhnaah an tih an phal a ni. A nihna takah chuan, a area DC-in committee a form ang a, SP, te, contractor te, PWD aiawh te nen; khang zawng zawng khan a *alignment* zawng zawng kha an ngaihtuahin, an approved tur a ni a. Committee din pawh a awm lova, Boundary commission kan kal pawhin hrehawm ka ti a ni. Sorkarin engmah a tih loh avangin, hrehawm kan ti a. Chuvang chuan, a khua-khuain hung pawnah an awm ta a, boundary fencing leh lam leh lamah in a awm a, an in-aupha reng a, mahse, inkawm tur chuan km eng emaw zat an kal a ngai thung a ni. Gate-ah chauh a luh theih a, chutah chuan an duty a. Mahni leileta feh tur pawhin permit a ngai a, *ram-buai lai* ang mai kha a ni a. A leh lama Bangladesh mite chu duh tawkin an lo kal thei si a, kan mite erawh chu an school-ah pawh an kal thei tawh lo; an field ah pawh an inkhel thei lova; an biak-in ah pawh an inkhawm thei tawh lo. Khatiang khan km 3 te, km 5 a hla-ah te fencing an

hung a Aa pawl em em a ni. 'Tute nge mawh phurtu' kan tih chuan, khatih hunlaia Sawrkar tho tho kha an ni. Kan va endik chin, a hnar lama an hungna chu an ti tha tawh a ni. Chung te chu thil awm zia a ni a.

Tunah hian, Tiau ah hung se, kha chia kha kan chan tur a ni. Chakai khawrh tur pawhin kan kal hlei thei tawh dawn lo; a chiang. Chuvangin, heng hi tih chi a ni lova. Central YMA ten an duh loh thu an chhuah tawh a, NGO ten an duh loh thu, Co-ordination Committee hmangin an chhuah a, lehkha pawh min pe a. Chuvang chuan, a bik takin kan BJP unaute pawh khan khu lama an thil tihtheihna kha hmang selangin, inthiar fihlim lek lek lo khan; a hmatawngah te pawh min tan sak sela, tumahin an ti dawn tak tak nge, tak tak lo kan hriat loh avangin, thawm neih chu a tha a ni.

Kan NGO te thawmah ringawt kan inngat thei lo; Sawrkar anga aw kan neih ve a tul a, chumi atan chuan kan Home Minister-in Official Resolution a rawn thehluh hi thil tul tak niin kan hria a, pass dial turin ka sawm che u a ni e. Ka lawm e.

HON. SPEAKER : Aw le, tunah chuan resolution neitu - Pu K. Sapdanga, Minister kan sawm ang a, han wind-up sela, adopt han dil nghal sela a tha ang e.

PU K. SAPDANGA, HON. MINISTER: Pu Speaker, ka lawm e.

Official Resolution ka put luh member zahawm takte'n thinlung leh tihtak zeta ngaihtuah chungin kan sawi ho a, a lawmawm ka ti tak zet a ni. Kan ngaihtlak tak ang khan, member kan sun takte hming leh vawiina opposition bench lam atanga min tawiaawmtute hming sawilan te a ngai a. A thawnthu in a keng tel miau baw si a; thil sawi nuam tak a ni hauh lova. Chutih lai in kan Leader of Opposition khan positive takin a lo dawngsawng thiam a, a lawmawm ka ti a, a chungah a bik takin lawmthu ka sawi a ni. A sawi tak ang khan (ama mimal rilru chu thildang daih a ni ang a), party ngaihdan rawn phochhuak tura tirh anih avangin, thu awih takin khatiang khan a rawn ti a ni mai a. Anni pawl hi thu-awih thei an ni a, hotu te'n, 'hek ru' an tih chuan, an hek tawp zel mai kha a ni a; an entawn tlak viau a nia.

Siaha bialtu khan, '*buana hmaa kherh*' tih kha a rawn sawi zeuh a; khawvel hi a hmanhmawh tawh a, a buan leh a kherh kan rual zel tawh mai a nih hi. Chuvangin, kan tlai palh a hlauhawm a, central lama kan hotu ten an sawi-ri chhen mai si a. Chuvangin, 'a kherh hmain lo buan a ngai a nih hi' tih ngaihdan Sawrkarin a nei avangin, he resolution hi kan rawn pulut ta a ni a. Amaherawh chu, fimkhur thuah chi hrang hrangin kan sawi a ni mai a. Kan House Leader-in a han sawi kha, ngen ka lo tum reuh reuh a ni a; keini zingah chuan hmatawng ber tur, kan hmatheh tur leh a au ring ber tura kan beisei Siaha Bialtu kha, lo inhum-sek se kan duh hle a ni.

Aw le, *biometrics* chungchang kha kan sawi lang zawk zawk a. Biometrics issue hi border fencing nen chuan a inang lo deuh a, *deportation* chungchang a kawk a. Chuvangin, resolution ah hian rawn telh loh a ni a, kan House Leader-in chiang takin a sawi a, han sawi fiah leh chuan a ngai awm lo e.

Tin, international boundary a ni a, a *security* chungchang hi State-sorkar kuta awm a ni lova, Central kuta awm a ni a. Chuvangin a duty atan pawh Central mite dah anni. Tichuan, *security lapse* - drugs, ralthuam leh Sorkarin a khap chi hrang hrang tawlh ruk te a lo awm a niha, chu chu ramri hung phah nana Sawrkar-laipuiin a hmang dawn anih chuan, ama chaklohna, ‘a mualpho’ tihna a ni. Chuvangin, he chhuanlam hi chu keini State-Sorkar leh mipuite hi chuan House leh House pawnah pawh kan NGO te pawhin nasa taka kan do hi a awm a ni. Tuna lam an rawn sial zawng zawngte pawh hi a nihna taka chhui chuan, Central Sorkar mawhphurhna vek a ni bawk a ni.

Tin, a *wording* chungchangah khan han khauh deuh kan chak a. A ni bawk a; khauh mi leh khauh lo mi deuh te hi awm a ni a; tawngkam pawh pawr deuh leh pawr lo deuh awm a nia. Amaherawh chu, a pawimawh lai chu – ‘eng tin nge materialize anih ang; engtin nge a taka chantir anih ang’ tih lai kha a pawimawh lai ber a ni a. Kan tawngkam hman chu a nem emaw, a khauh emaw, a taka chantir a nih khan a danglam lem lova. A lo dawng sawngtu tan ‘eng ang nge dawnsawn nuam ang’ tih kha zawng ta ila. Mipui aiawha kalkhawm chuan tihdan thuhmun rau rauah tawngkam nem zawk hman chu kan tih awm tak niin a ngaih theih awm e.

Tichuan, Pu Speaker, kan sawifiah tlang viauin ka hria a, a hranpa a sawifiah vak tur pawh awmin ka hre lova. Chuvangin, official resolution vawiina ka rawn put luh – “Central Sorkarin *free movement regime* tih tawp a tum leh, Myanmar nena kan inrina *border fencing* kalpui a tum hi, tha kan ti lova, ti lo turin kan ngen a ni. Chuvangin -

“*Dik lo taka British sorkarin Divide and Rule policy hmanga zofate min thendarh hi, rorelna pakhat hnuaia kan awm leh theihna turin hma min lakpui zawk rawh se*” tih hi, he House hian a dopt turin ka rawn dil e. Ka lawm e.

HON. SPEAKER : Aw le, Resolution neitu kan Home Minister zahawm takin official resolution a rawn put luh chu pass pui turin House a rawn dil a. Kan Home Minister Resolution - “Central Sawrkarin *Free Movement Regime* (FMR) tihtawp a tum leh, Myanmar nena kan inrina, *Border Fencing* kalpui a tum hi tha kan ti lova, ti lo turin kan ngen a ni.

“*Dik lo taka British Sawrkarin ‘Divide and Rule Policy’ hmanga Zofate min thendarh hi, rorelna pakhat hnuaia kan kun leh theihna turin hma min lakpui zawk rawh se*” tih a ni a. Resolution adopt remti apiangin, ‘remti’ ti rawh u le. (*Meberte’n adopt an remti*

a..) Remti lo kan awm em? Kan awm chuan, ‘remti lo’ ti ula. (*Memberte remti lo an awm lova..*) Aw le, a lawmawm e.

Home Minister zahawm tak Pu K. Sapdanga Resolution put luh chu he House hian lungrual takin a adopt ta a ni. (**Pu K. Sapdanga, Home Minister:** Pu Speaker, ka lawm e.)

FINANCIAL BUSINESS : DISCUSSION AND VOTING ON SUPPLEMENTARY DEMAND FOR GRANTS FOR THE YEAR 2023-2024

Aw le, tunah chuan, *Discussion and Voting on Supplementary Demand for Grants for the year, 2023-2024* kan la ang a. Bulletin pawh Ni 27.2.2024 khan budget document-ah rawn telh a ni a. Chief Minister zahawm tak (Finance changtu ni baw) Pu Lalduhoma, *Supplementary Demand, 2023-2024* chu House-a rawn submit turin ilo sawm ang.

PU LALDUHOMA, HON. CHIEF MINISTER: Pu Speaker, Governor recommendation leh i phalna angin, “*The Mizoram Appropriation (Supplementary Demand for Grants (2023-2024) Bill, 2024*” hi he House zahawm takah hian introduce phalna ka rawn dil e.

HON. SPEAKER : Aw le, tikhan introduce phalna a rawn dil a, kan remti em? (*House-in a remti a..*) Kan remtih chuan, House-ah rawn *lay-a*, rawn sawifiah nghal baw) turin ilo sawm ang.

PU LALDUHOMA, CHIEF MINISTER: Pu Speaker, I phalna leh he House remtih nain “*The Mizoram Appropriation (Supplementary Demand for Grants 2023-2024) Bill, 2024*” hi he House zahawm takah hian ka rawn introduce a. I phalna angin ka’n move nghal ang a.

“On the recommendation of the Governor of Mizoram, and with your permission, Sir, I move the additional grants for Demand Nos. 1, 3, 4, 5, 6, 7, 8, 9, 11, 12, 13, 14, 15, 16, 17, 18, 19, 20, 21, 22, 23, 24, 25, 26, 27, 28, 29, 30, 31, 32, 33, 34, 35, 36, 37, 38, 39, 40, 41, 42, 43, 45, 46, 47 and 48 for Rs. 3287 crore, 93 lakh, 49 thousand only for meeting expenses during 2023-2024 in respect of the following Departments” tih a ni a.

Pu Speaker, move paha tawite ka han sawi duh chu, *Supplementary Demand* hi sawrkar-kum kal ta chhunga Budget Session-a kan pass bak, hman lo ngai ta site han chulmamna tur a ni a, hmun thumah hian a then theih deuh mai awm e –

1. Finance Department-a sum lo park sa, dah khawl kha department hrang hrangah pek a lo ngai ta a. *Entirnan:* SEDP fund ang te, chu chu re-provision a ngai thin a ni. Kan pass laia mi nen khan a inan tawh loh avangin re-provision a ngai thin a, a amount a danglam chuang lova, khatia han her rem mai kha a ni a.

2. A dang lehah chuan, CSS tih vel te, Budget kan pass laia kan la dawn si loh, a hnua Sawrkarin a dawn belhte kan budget-ah a lo lut a, heng hi a tha lam leh a lawmawm lam a ni a; a tam poh leh a lawmawm thin a ni.
3. A dang leh chu, sum indaihlohna avanga pek belh lo ngai ta a ni a, hei hi chu ‘a lawmawm lo lam’ kan tih thin kha a ni a. Pension te pek belh a lo ngai a, State Matching Share te, buhfai leina te, tui pump-na te, loan rulhna te, SEDP-Teachers lakna te, SEDP-Health Worker lakna te, khang ang chi kha Budget Session laia thil awm lo, Sawrkarin a sen belh te a ni a. Chung belhkhawm chu tuna ka rawn move tak kha a ni a. Hei hi min pass-pui turin ka rawn ngen e.

HON. SPEAKER : Aw le, Finance changtu kan House Leader khan *Supplementary Demand* kha move a rawn dil a, a rawn sawifiah bawk a. Tunhmain *Supplementary Demand* hi budget discussion-ah sawiho a ni ngai lova, sawitu thenkhat phei chuan, “kum 50 chuang kan lo kalpui tawh a, sawiho loh tura ngaih a ni” ti te pawhin sawi a ni a. Tuna Sawrkar chuan heng mipui sum a lo hman lawkah hian member-te leh mipuite’n an hriat a sualna a hre lova. Chuvangin, tunhmaa tih ngai loh *convention* kan break dawn a ni.

Supplementary Demand hi sawiho kan duh em? (*House-in sawiho ngai a ti lova.*) Aw le, ‘sawi ho a ngai lo e’ kan tih chuan, a lawmawm e.

Leader of Opposition khan sawi duh a nei em? Sawi duh te a neih chuan, kan sawm ang a, sawi duh a neih hran loh chuan, ‘sawm ngei tur’ tih pawh a awm chuang lova. A nei maw? Aw le, ilo sawm ang.

PU LALCHHANDAMA RALTE, OPP. LEADER: Tawitein, Pu Speaker. Tuna kan han sawi tak ang khan, *Supplementary Demand* hi Constitution-ah pawh ‘Supplementary for Grant’ tih emaw, ‘Additional Grant’ tih emaw, ‘Excess Grant’ tih te emawin a intarlang a. Article 205 ah khan State Assembly hian sum mamawh belh, memberte pawmpui tur vote a ngaih ve si avanga tih a ni a, khawi state ah mah han sawi ho viau te, Parliament-ah pawh han sawi viau a nih loh avangin rawtna kan rawn siam ang khan, sawrkarin mamawh belh a neih siamrem ngai laite hi chu kan hriatthiam mai kha a thain ka hria a. Kan House Leader, Finance Minister in pass-pui tura min rawn sawm ang khan, pass nghal mai kha ka rawn thlawp e.

PU C. NGUNLIANCHUNGA: Ka han zawt teh ang aw, khawngaih.

Phek 80na - District Council & Minority Affairs ah hian cheng tam tak pek belh an ni a, a lawmawm khawp mai a. Lai Autonomous District Council-ah hian ₹1,699.28, Mara Autonomous District Council-ah hian ₹2,372.06 a ni a, CADC ah hian ₹2,656.86 pek

belh an ni a, a tam khawp mai a. Helai hi “eng criteria hmangin nge pek an niha, an sum daih loh dan azira pek nge an nih?” tih kha khawngaihin min hrilhfiah sak thei se.

Tin, helamah a sawifiahna, pakhatnaah hian, ‘₹1,699.28 lakh additional fund under GIA salary for LADC’ tih a ni a, a pahnihnaah khan, ₹2,372.06 lakh additional fund under GIA salary for LADC tih a ni leh a. Kha kha MADC tih tur niawm tak a ni a. A sawifiahna lamah khan MADC lam a kha a lang ta lo tlat mai a. Hei hi document-a awm tur a ni a, nakin zela tan pawh khalai kha tih that tha ka ti a.

Tichuan, a pathumnaah hian, ‘a sum of ₹2,656.86 lakh, nichina kan sawi ang tho khan, ‘CADC’ tih kha a ni a, a dik mai a. Khalai a note-a pawh khan han tihchian deuh tha ka ti a. Hei hi eng criteria hmangin nge pawisa hi Supplementary Demand ah hian kan pek? Hlawh indaih loh dan – ‘*grant in aid, general salary*’ tih a ni a. District Council-te hi helai hian kan sawi thin a, hlawh indaih lova pek deuh zel a hi anni a. Tun tumah hian heti zat zata hlawh indaih lohna awm thina hi; hei, ka bulah CADC an hotupa a thu a, anni lamah te chuan hnalak chungchangah te pawh hian complaint a awm deuh reng thin a. Vawiin niah hian khatiang te kha kan regularize sak zel mai dawn em ni?

Tin, helai Budget Session kan neihah pawh, vawiin nia kan House Leader ngei pawh hian a sawi thin a chu - Supplimentary Demand hi ‘sawi tur a ni’ a ti a, amaherawhchu hei hi sawi vak a ni ngai lem lova. Amaherawhchu, kan lo sawi ve thina chu, *revenue expenditure* titem chuang silova *capital expenditure* tur titem si a; a tawpkhawka salary tur, (hetah pawh hian han keu ila) sum leh hlawh daihlohna pek belhna tam tak a awm a ni. A chhan chu, budget an siam lai khan hlawh daihloh sain dah a ni a, kha kha sawrkar hmasaah khan kan lo sawisel tawh thin a, kum tawpah supplementary demand-in inrawn chhung khat leh ang a. Hei hi chu mipui bumna a ni. *Revenue expenditure* san in hlau a, amaherawh chu, a tak ramah *capital expenditure* a mi tihitem in hlau a, in pawt let leh tho si a, hetah pawh hian revenue section ami tih laia kha a ni thin a.

Hei, vawiin niah pawh a takin a rawn lang a. Tun sawrkar thar te hi chuan engmah mawh a la phur chuang lova, sawrkar-hmasa kal tawh rawn regularize kha a ni mai a. Chutih rual chuan, tun sawrkarah chuan nakinah *general discussion* kan la nei ang a, hei hi kan phak tawkin kan lo zir ve zel a, beiseina sang tak te pawh a awm a, kha lai te kha. ‘Eng hmangin nge sum kan pek, Autonomous District Council pathumte kha?’ tih kha. Tunhma te chuan 7:911 ratio te hi hman thin a ni a, sum pek danah hian. ‘Helaite hi chu’ tih laite kha ni.

HON. SPEAKER : Aw le, tunah chuan, CM zahawm tak Pu Lalduhoma kan sawm ang a, sawifiah ngai a tihite sawifiahin, House-ah pass pui turin han dil nghal sela, ilo sawm ang.

PU LALDUHOMA, HON. CHIEF MINISTER: Pu Speaker, kan Member zahawm tak Pu C. Ngunlianchunga zawhna kha – ni e, Supplementary Demand ah hian clarification te inzawh a thianga, tin kan List of business ah pawh hian ‘Discussion on Voting’ tih ngat a ni a, Constitution-ah pawh a ni a. Amaherawh chu, discuss a sawt tawh loh ema vang hian kan discuss thin lo a ni mai a, inzawh fiah kha a thianga viau a ni. *Bill* a ni ve teh meuh a, figure dik lo leh ‘a awmna hmun a diklo’ tih vel kha chu kan lo check chianga a, kan ti dik mai ang a.

Hei, Supplementary-ah hian ADC pathum atan hian cheng nuai 6,728 hi pek belh a ni hial mai a, a thahnem hle mai a. A tirah khan an mamawh daih lo khan sawrkarin a lo pe a nih hmel a, a hnu ah an va dil leh dek dek a, (inbiak thiam deuh te pawh kha a ngai thin em maw ni, tunhma lampang khan chuan) tichuan, ‘an lo pek belh ta a ni ang’ ka ti deuh mai a. A chhan chu, a chhang thei turte kha hetah an awm tlat tawh lo mai a, a pe belhtu a te kha kan bulah anawm tawh si lova, kan hre ve phak lo a ni. khalai kha chu. Engpawh ni sela, Sawrkar-hnathawk department hrang hranga mite hian salary kumkhat daih hi an lo dah lo thin a, a chhan chu kan leiba lan tlem tir an chak vang a ni a. Tichuan, revised estimate ah an ti leh tho si a, kan figure kha a rawn danglam leh duai a; hei hi chu mipui kan bumna a ni. ‘Chhiarkawp diklo hi kan hmang rei lutuk a ni’ ti thin tute kha kan ni a. Chuvang chuan, tuna budget kan han pharh takah kha chuan a dik thei ang ber chuan kan rawn ti ve a ni. Chu chu a inher dik chho hret hret turah ngai ila; kan nih ang ang hian ilang ngam ang u. Kan leibat tur pawh budget session-ah tlemte an rawn ziak a, kum tawp ah a lo tam leh vak mai si a. Khatiang kha a awm tawh lohna turin, ‘a nihna ang tak hian kal ang’ kan ti a.

Tin, kan Directorate of Statistic lam pang hian tihdan te pawh hi an nei ve a, kan GSDP te pawh, ‘a dik maw hei hi?’ kan han ti a, mahse an chhut dan a ni an ti ve tlat mai a, tihdanglam dan hi a vang viau mai a. GSDP te hi diklo deuha kan hriat thin a nih avang khan tih dik kan han tum a. Mahse anni khan kalphung kha an lo nei a, tihdanglam vak ngaihna kha a lo awm lem lo a ni e.

Pu Speaker, nichina ka rawn ngen tawh ang khan, he Supplementary Demand hi min pass sak turin ka rawn ngen nawn leh e.

HON. SPEAKER : Aw le; kan CM zahawm tak Pu Lalduhoma’n - Supplementary Demand for the year, 2023-2024, Voted Amount ₹32,87,93,49,000/- chu House pawmpui turin a rawn dil a. Remti a piangin, ‘remti’ ti ula, remti lo kan awm chuan, ‘remti lo’ ti ula. (*Memberte’n an remti a.*)

Aw le, a lawmawm e. Supplementary Demand for the year, 2023-2024 chu House-in lungrual takin a passed ta a ni. (**Pu Lalduhoma, CM:** Pu Speaker ka lawm e.)

LEGISLATIVE BUSINESS:

HON. SPEAKER : Aw le, tunah chuan Legislative Business ah kan kal ang a. Tuna kan passed tak - Supplementary Demand for the year 2023-2024 kan hman theihna tur bill kan ngaihtuah a ngai a, CM zahawm tak Pu Lalduhoma'n "The Mizoram Appropriation of Supplementary Demand for Grant, (2023- 2024) Bill, 2024" hi House ah introduce dil turin ilo sawm ang u.

PU LALDUHOMA, HON. CHIEF MINISTER: Pu Speaker, "The Mizoram Appropriation of Supplementary Demand for Grant, (2023-2024) Bill, 2024" hi introduce ka han dil a. Pu Speaker, kan tihdan ve tho a ni a, pass tura rawn dil nghal i remtih chuan, ka rawn dil nghal ni teh se. Ka lawm e.

HON. SPEAKER : Aw le, kha, kan CM zahawm tak (Finance changtu ni baw) in introduce rawn dilin, a rawn moved a, pass a rawn dil nghal a. Member-te engnge kan ngaihdan le? A tha mai em? (*Memberte'n a tha an ti a.*) Aw, a lawm awm e.

A nih chuan, Chief Minister zahawm takin pass a rawn dil nghal baw a. "The Mizoram Appropriation Supplementary Demand for Grants, 2023-2024, Voted Amount ₹32,87,93,49,000/- leh Charged Amount ₹6,22,37,000/-, a belhkhawm ₹32,94,15,86,000/- hman theihna tur bill - The Mizoram Appropriation Supplementary Demand for Grants (2023-2024) Bill, 2024" chu House-in lungual takin a pass ta a ni. (**Pu Lalduhoma, CM:** Pu Speaker ka lawm e.)

Tunah Legislative business dangah kan kal leh ang a. Government Bill sawi ho tur kan nei a. Bill copy hi memberte hnenah sem lawk vek a ni a. "The Mizoram Lokayukta Amendment Bill, 2024" chu a bill neitu Pu Lalduhoma, Chief Minister zahawm takin House-a introduce phalna lo dil se, ilo sawm ang u.

PU LALDUHOMA, HON. CHIEF MINISTER: Pu Speaker, i remtihna leh House remtihna, "The Mizoram Lokayukta Amendment Bill, 2024" hi introduce ka rawn dil e.

HON. SPEAKER : Bill neitu kan Chief Minister zahawm takin House-ah introduce a rawn dil a. Kan phalsak em? (*House-in a phalsak a.*) Kan phalsak chuan tunah introduce se, sawiho turin rawn move nghal se. I lo sawm ang u.

PU LALDUHOMA, HON. CHIEF MINISTER: Pu Speaker, he Bill hi ka rawn introduce a. Tin, rawn move nghal tura min phlasak angin ka han move nghal baw ang a.

Lokayukta Bill hi 2014 khan House hian a lo passed a, hmanhmawh deuh taka tih a nih avangin siam that a ngai thin a. 2016 khan siam that a ni tawh a. 2012 khan siam that a ni leh a, 2018-ah a ni leh baw a. Tichuan, tuna kan rawn chhawp chhuah hi sawrkar-

hmasa *Council of Ministers* in *by circulation* a tul an tih, an lo pawm tawh kha a ni a. Ni. 8.3.2021-ah khan Cabinet chuan he bill hi a lo pawm tawh a, amaherawhchu, an pharh hman ta lova. Tichuan, ordinance te pawh kha an han buatsaih a ni a.

Tichuan, hun a lo kal leh hret a. Sawrkar-hmasa tho khan Political & Cabinet Department-ah te zir chian leh zual turin a lo thawn let leh a. Tichuan, a lo let chho leh a, tunah hian *Council of Ministers* in a han thlir nawn ve leh a. Tah chuan tlem tih danglam ngai, a *wording* leh a *terminologies* siam that ngai hret hret te kha a la awm a. Chung chu siam that turin kimchang leh zualin kanrawn chhawp chhuak ta a ni.

He bill hi a mal te tea kan sawi dawn chuan, hun a chep tawh a; Pu Speaker, sawi teuh tur a awm ang a. Kan bill, kan dan neih lai famkim lo deuh lai terawn tih chiana, paih ngai te paiha, belhchhah ngaite belhchhaha, chutianga a tulna avanga rawn irhchhuak chu a ni a, han chai teh chiam tur pawh a awm em em lova. Chuvang chuan, hun a hek loh nan ka sawi thui vak lo mai ang a. Nakin discussion hunah memberte'n zawh fiah duh te an neih leh, chung erawh chu a tul angin kan la react zawk dawn nia. Ka lawm e.

HON. SPEAKER : A lawmawm e. Chief Minister zahawm takin a bill chungchanga sawi turte sawiin a rawn ding a. A rawn putluh chhante min hrilh a. Amendment bill a nih avangin sawi ho vak ngai lo tura ngaih a ni a. A move tuin fiah takin amendment ngai chungchangte a rawn sawi fiah tawh baw k a. Hetiang amendment bill hi sawi vak loa pass a ni thin a. Amaherawhchu, sawi duh te awm theih a ni a. Sawi duh kan awm em? Kan Opposition Leader, opposition aiawhin lo sawm ila. Tha a tih ang te sawi turin. Tichuan kan proceed zel dawn nia. ilo sawm ang.

PU LALCHHANDAMA RALTE, OPP. LEADER: Pu Speaker, ka lawm e. Kan House Leader sawi ang khan amendment hi uluk taka kan mi-thiamte dawhkan hrang hrang kal chho tawh leh Cabinet tum hnih kal tawh a ni a. MNF Ministry Cabinet a kal tawh hnuah ZPM Ministry Cabinet pawh a kal leh tawh a. Chutiang chuan, a theih ang chin chin chu a han pal chho a.

Amaherawhchu, mahni ngei pawh hian thil hi han chhiar han chhiar hian kan House Leader-in min han chhan fel atan, pakhat hi duplicacy eng emaw awm theiin ka hria a. Chu chu, Amendment Section 43-na, a phok 5-naah khan Sawrkar-hnathawk bikte kha *Property Return* hmangin movable leh immovable assets an declare thin a. Tuna kan dan thar han tih turah hian an assets leh liabilities te tih ve lehna tur kha a awm a. Pu Speaker, i rem tihnain han chhiar lawk ka han duh chu, Amendment Section 43-na ah khan *'on and from the date of commencement of this act, every public servant shall make a declaration of his assets and liabilities in such form and manner as may be prescribed'* tih kha a awm a. Hemi, tuna kan hman lai property return - *moveable* leh *immoveable* an peka hi an ti dawn tho nge, an tikawp dawn; a khawi zawk hi nge an rin

ang? ‘Sawrkar-hnathawk khan chihnihin an pe dawn nge, pakhtah chauh ang pe ang?’ tih te kha, eng emaw, helaiah hian a hma ami han paihna chiah kha a awm lova, dan thar kan han insert khan helaia lo awm hian, ‘kan Sorkar-hnathawkte tan khan hmunhnihah declaration an pe dawn nge?’ tih te kha a Chiang lo lai a awm avangin min han clarify sak se. A bak hi chu ka chhiar ka chhiar a, eng eng emaw tlema a wording diklo lai han siam that ngai mai te hi niin ka hria a. Tichuan, amendment a rawn tih ang hian pass-pui pawh ka rawn ngen sak nghal e.

HON. SPEAKER : A lawmawm e. Tikhan Lok Ayukta Amendment Bill, 2024” chu House pass-pui turin rawn move-tu khan a rawn dil a. Tin, kan Opposition Leader zahawm tak Pu Lalchhandama Ralte-in a observation te a rawn sawi tawh bawh a.

Sawi tak ang khan, tunhma lam atanga lokal tawh, ‘cabinet meeting pawh kaltlang chho tawh a ni a, sawi chiam a awm tawh lo’ tih kha kan ngaithla a. Tichuan, a bill neitu, kan Chief Minister zahawm Pu Lalduhoma, a bill te wind up a, House pass-pui lo dil turin kan sawm ang a.

Chumi hma chuan thil pakhat tih hmaih kan lo nei hlauh a, *Mizoram Appropriation Supplementary Demand for Grants 2023-2024* a bill copy kha kan lo sem hmaih palh hlauh a, tunah sem ni se. Member-te khan min lo hrethiam ula.

Kan chang kim maw? Tunah chuan kan Chief Minister zahawm tak Pu Lalduhoma, a bill wind up a, House pass-pui dil nghal turin ilo sawm ang u.

PU LALDUHOMA, CHIEF MINISTER: Pu Speaker, Opposition Leader zahawm takin a rawn zawhfiahna kha, zawh awm tak pawh a niin ka hria a, a lo thlir ngun hle niin ka hria a, lawmawm ka ti a. “

Lok Pal & Lok Ayukta Act, 2013 hi Central Sawrkar-in a pass a, khami a pass tak hnuah khan, keini dan nena inmil lo lai siam rem ve kha a lo ngai ta a, chu chu tuna kan Amendment rawn propose ah pawh hian, chumi avanga tih ngai chu eng emaw zat a tel a, chung zinga mi chu section 43 hi a ni. Tichuan, Ministry of Law and Justice-ina Dan a siam 2016 ah khan *property return* chungchang hi a awm a, tunah hian a tih dan tur kalhmang an rawn siam thar a ni. Chutah chuan, tlar hnih lekah a thehluh dan tur hi an rawn thlak a, thehluh dan tur kalhmang leh “thehluhna tur form siam huna thehluh tur” tiin an rawn thlak a ni. Kan Dan hluiah hian hemi chungchang hi a inziak duah mai a, tuna amend rawt ang hian tawitein, ‘*in such form and manner as may be prescribed*’ a rawn ti ta mai a, a prescription kha chu a rules-in a rawn take-care tawh thung dawn a ni. Chutianga tha zawk tura tih chu a ni a.

Tin, *Annual Immoveable Property Return* rualin kha kha an rawn thehlut dawn a ni a, hei Sawrkar-hnathawkte pawhin leiba an neihte pawh an rawn declare a ngai dawn a, ‘khami rual khan an ti tawh dawn’ tihna a ni. Hei hi a tha zawk tawh tura an ngaih a ni ang nge.

Pu Speaker, he “*Lok Ayukta Amendment Bill, 2024*” hi he House zahawm tak hian min pass-pui turin ka rawn dil e.

HON. SPEAKER : Aw le.. kan Chief Minister zahawm tak khan “*The Mizoram Lok Ayukta Amendment Bill, 2024*” chu House pass-pui a rawn dil ta a, tunah kan buk ang a.

Pass remti apiangin, ‘remti’ ti ula; remti lo kan awm chuan, ‘remti lo’ ti ula. (*Remti lo an awm lova..*)

Aw le, “*The Mizoram Lok Ayukta Amendment Bill, 2024*” chu he House hian lungrual takin a pass ta a ni. (**Pu Lalduhoma, CM:** Pu Speaker, ka lawm e.)

HON. SPEAKER : Aw le; vawiina kan business chu kan zo ta a, naktuk Ni 29th February, 2024 chawhma dar 10:30 ah kan thukhawm leh ang a.

Hei, vawiin Nilaini hi traditional dress - *hnam inthuama inthuam ni* atan sawrkar hmasa lamin a lo tih kha, ‘i chhunzawm ang u’ tiin ngenna kan siam a, helam atangin member-te kan zawm tha hlein ka hria a, lawmthu kan sawi a ni.

The Sitting is adjourned (3:21 PM)